

明鄭曉撰

皇明四夷考

(國學文庫第一編)

總發售處

北平隆福寺街  
文殿閣書莊

舊



由國家圖書館數位化、典藏

明鄭曉撰

皇明四夷考



(國學文庫第壹編)

總發售處

北平隆福寺街  
文殿閣書莊

據萬曆年刊吾學編重印

(實價國幣六角)



669  
646  
26  
皇明四夷考序

四夷何以首安南也。我郡縣也。次兀良哈何。我武衛也。哈密女直非歟。羈縻之虜。非我官長也。兀良哈之有三衛。以靖難歟。非也。大寧之北。有三衛也。蓋自洪武始也。其南據大寧也。乃自永樂始也。將復交趾而收大寧乎。都統之議夷且曠我革蘭台以駸駸乎我貳矣。棄哈密而撫女直乎。哈密罷我河西。女直扞我遼東也。土番入哈密而嘉峪不驚。胡虜通女直而山海弗靖矣。朝鮮何以次兀良哈也。知禮教也。大國也。琉球小夷。何以次朝鮮也。學于中國也。何以終韃靼也。非勅寇乎我勝國也。盛衰之運。中國有安危焉。以故別考而存之。戰守之略。可幾而得矣。高皇何以有海外之使也。更始也。成祖西洋之纜。不已勞乎。鄭和之泛海與胡濙之頒書也。國有大疑焉爾。堯三王胡四王。我厘厘焉。西番五王。世優之。何也。不能爲我深創也。苟因俗而治之。得相安焉可矣。西域何以不得浮南海也。王公設險假樹渠焉。如之何使其縱橫出入。幾徧宇內也。海島之夷



勤我封使。往來之禮歟。夷不言往來。往來言諸侯也。四夷來王。八蠻通道。未聞有報使焉。然則領封可乎。奚爲而不可也。陪臣請命于京師。王人致命于海上。非往來乎。嗚呼。均覆載者。天德也。辨華夷者。王道也。昔也外夷入中華。今也華人入外夷也。喜寧田小兒。宋素卿。莫登瀛。皆我華人。雲中閩浙。憂未艾也。是故慎封守者。非直禦外侮。亦以固內防也。池魚故淵。飛鳥舊林。人情獨不然乎。彼其忍於捐墳墓。父母妻子。鄉井而從異類者。必有大不得已也。嗚呼。德惟善政。政在養民。盍亦反其本矣。不然。而欲郡縣我子弟。武衛我干城。烏可得哉。

嘉靖甲子三月朔日鄭曉識

皇明四夷考目錄

卷上

安南	二
兀良哈	二六
朝鮮	二〇
琉球	二四
女直	二七
三佛齊	三一
占城	三三
日本	三五
真臘	三〇
暹羅	四〇
蘇門答刺	四七
爪哇	四八

皇明四夷考目錄

古俚	五一
淳泥	五一
滿刺加	五二
榜葛刺	五三
錫蘭山	五四
蘇祿	五五
柯枝	五六
祖法兒	五七
瀋山	五七
南泥里	五六
黎伐	五六
哈密	五六
赤斤蒙古	五三
定定阿端	五三
曲先	五四
罕東	七四

撒馬兒罕	七五
天方	七七
迭里迷	七七
渴石	七六
養夷	七六
達失干	七六
卜花兒	七六
土魯番	七九
黑婁	八一
鹽澤	八一
哈烈	八二
默德那	八三
俺都淮	八三
八刺黑	八四
于闐	八四
火州	八四

別失八里	八五
魯陳	八六
沙鹿海牙	八六
賽藍	八七
哈失哈力	八七
亦力把力	八七
阿丹	八八
白葛達	八八
呵哇	八八
瑣里	八八
西洋瑣里	八八
彭亨	八九
百花	八九
波羅	八九
阿魯	九〇
小葛蘭	九〇

拂林	九〇
古里班卒	九〇
呂宋	九〇
合貓里	九一
碟里	九一
打回	九一
日羅夏治	九一
忽魯母恩	九一
忽魯謨斯	九一
甘巴里	九二
麻林	九二
古麻刺	九二
沼納樸兒	九二
加異勒	九二
黑葛達	九二
敏真誠	九三

八答黑商	九三
覽邦	九三
火刺札	九三
討來思	九四
吃力麻兒	九四
失刺思	九四
納失者罕	九四
亦思把罕	九五
淡巴	九五
甘把里	九五
白松虎兒	九五
答兒密	九六
阿速	九六
沙哈魯	九六
西蕃	九七
撻兒	一〇一

皇明四夷考上卷

海鹽 鄭曉

皇明祖訓曰。四方諸夷。皆限山隔海。僻在一隅。得其地。不足以供賦。得其民。不足以供役。若其自不揣量。來擾我邊。則彼爲不祥。彼旣不爲中國患。而我興兵輕伐。亦不祥也。吾恐後世子孫。倚中國富彊。貪一時戰功。無故興兵。致傷人命。切記不可。但胡戎與西北邊境。互相密邇。累世戰爭。必選將練兵。時謹備之。不征諸夷。東北朝鮮。卽高麗。其李仁人及子成桂。今名且者。自洪武六年至二十八年。首尾凡弑王氏四王。姑待之。正東偏北日本。雖朝實許暗通。奸臣胡惟庸謀爲不軌。故絕之。正南偏東大琉球。朝貢不時。王子及陪臣之子。皆入大學。讀書禮待甚厚。小琉球。不通往來。西南安南。三年貢。眞臘。朝貢如暹羅。常貢海如占城。自占城以下。諸國至十二年。方乃得止。國濱海。蘇門答刺。濱海。西洋。濱海。爪哇。濱海。彭亨。居海。百花。居海。三佛齊。居海。淳泥。居海。

洪武四年九月。上御奉天門。諭省府臺臣曰。海外夷國。爲患中國者。不得不討。不爲中國患者。不可輒用兵。古人言。地廣非久安之計。民勞乃易變之源。隋煬

帝妄興師旅。征討琉球。荼毒生民。徒慕虛名。疲中土。載諸史冊。爲後世譏。朕以諸小蠻夷。阻越山海。不侵中國。無煩用兵。惟西北胡戎。世爲中國患。不可不謹備。卿等記此言。知朕意。

洪武十五年。命翰林侍講火原潔等。編類華夷譯語。上以前元素無文字。發號施令。但借高昌書。製蒙古字。行天下。乃命原潔。與編修馬懿。赤黑等。以華言譯其語。凡天文地理。人事物類。服食器用。靡不具載。復取元祕史參考。以切其字。諧其聲音。旣成刊布。自是使臣往來朔漠。皆能得其情。

凡四夷分十八所。設通事六十人。大通事有都督都指揮等官。統諸小通事。總理貢夷降夷及歸正人。夷情番字文書。譯審奏聞。

永樂七年。遣太監鄭和。王景弘。侯顯。率官兵三萬。下西洋。凡西洋功次。卽非斬首選法不得減革。十三年。吏部員外郎陳誠。上使西域記。凡十七國。

安南。安南。唐虞時南交也。秦爲象郡。漢爲南越。所據。武帝平南越。置交趾。九

眞。日南三郡。朱梁時。始土豪曲承美者據之。已而并于劉隱。未幾。管內大亂。眾推豪酋丁部爲州帥。部子璉繼立。宋旣平嶺表。璉遂內附。黎桓篡丁氏。李公蘊又篡黎氏。陳日暎又篡李氏。宋以遠夷故置不問。相繼皆封爲交趾郡王。元朝兼有華夷。至憲宗。遣將破其國。而日暎竄居海島。弱不能支。始歸附。元封其子光昺爲安南國王。光昺死。子日烜自立。元發兵破之。日烜卒。子日燁遣使朝貢。元末。天下大亂。安南不至。明興。削平羣盜。驅逐胡元。洪武元年。登極。詔諭薄海內外。日燁大懼。又聞征南將軍廖永忠。副將軍朱亮祖。帥師逾嶺。降何眞。定廣東西。日燁欲納款。又以梁王尙在雲南。持兩端。二年。始遣其少中大夫同時敏。正大夫段悌。黎安世等。來朝貢。請封。遣侍讀學士張以寧。典簿牛諒。封日燁爲安南國王。賜駝紐塗金銀印。以寧等至安南界。日燁已卒。其弟日烜嗣立。遣阮汝亮迎。請誥印。以寧等不從。日烜遣杜舜欽等。請命于朝。以寧駐安南候命。詔封日烜爲王。是年。遣翰林編修羅復仁。兵部主事張福。詔諭安南占城國王。各

罷兵息民。皆聽命。三年。日煇卒。封其子日鑑嗣王。五年。陳叔明遣人朝貢。卻不受。明年。又遣人納貢。謝罪請封。常是時。煇嗣王叔明者。煇兄也。專國政十二年。煇遣使來貢。上惡其彊悍。數侵占城。詔諭叔明。二十年。煇遣使貢賀聖壽。二十一年。國相黎季犛。廢其主煇。幽大陽坊。尋弑煇。立叔明子日焜。主國事。二十二年。又弑日焜。假煇名。遣人來貢。二十六年。遣禮部尙書任亨太。監察御史嚴震直。諭令出兵。討龍州趙宗壽。二十七年。遣人朝貢。卻不受。二十九年。遣行人陳誠。呂讓。諭令還思明伍縣。不聽。陳氏傳十二世。至日焜。而黎氏篡立。僭稱皇帝。國號大虞。紀元天聖。永樂初。季犛上表。竄姓名爲胡一元。子蒼易名奩。詐稱陳氏絕。奩爲陳氏甥。求權署國事。朝廷從其請。逾年。陳王孫添平走至京。言季犛弑篡。季犛詐上表。請迎添平歸還以國。上遣行人聶聰。送添平歸國。勅征南副將軍黃中。呂毅。率兵禦之。季犛伏兵芹站。殺添平及我使人。上怒。永樂四年七月辛卯。以成國公能。爲征夷將軍總兵官。西平侯晟。新城侯輔。左右副將軍。豐

城侯彬。雲陽伯旭。左右參將。大將軍率右副將軍。右參將及清遠伯友。統神機將軍程寬。朱貴。遊擊將軍毛八丹。朱廣。王恕等。橫海將軍魯麟。王玉。商鵬。鷹揚將軍呂毅。朱吳。江浩。方政。驃騎將軍朱榮。金銘。吳旺。劉塔等二十五將軍。以兩京畿。荆湖。閩浙。廣東。西兵。出廣西。憑祥。左副將軍左參將。統都指揮陳睿。盧旺等。以巴蜀。建昌。雲貴兵。出雲南。蒙自。兵部尙書劉儻。參贊戎務。尙書黃福。大理寺卿陳洽。轉餉。是日。上幸龍江禱祭。誓眾曰。黎賊父子。必獲無赦。脅從必釋。毋養亂。毋玩寇。毋毀廬墓。毋害稼穡。毋恣取貨財。毋掠人妻女。毋殺降。有一於此。雖功不宥。毋冒險肆行。毋貪利輕進。罪人既得。卽擇立陳氏子孫賢者。撫治一方。班師告廟。揚功名於無窮。其往勉之。時晟鎮雲南。先遣彬。以征夷副將軍印制授晟。十月。輔兵度坡壘關。傳檄數黎賊二十罪。遂入雞陵關。晟兵至白鶴江。賊拒守富良江。能卒。以輔爲征夷將軍。代能。十二月。勅行人朱勸。諭黎賊。晟兵奪宣江。進次沱江。輔兵渡沱江。合兵渡富良江。進克多邦城。焚賊西都。賊走入。

海。輔駐兵交州。晟追賊至木丸江。五年正月。輔晟合兵。破籌江柵。賊走悶海口。敗之富良江。五月。賊走乂安。都督僉事柳升。率舟師追賊。敗之。得賊船三百。賊遁且入海。輔晟乘勝追之。升引兵出奇羅海口。賊敗。率王柴胡等七人。擒季擎。李保等十人。擒其子澄。安南人武如卿等。僞大虞皇帝蒼。僞太子芮。僞將相王侯柱。國黎季瓠等。詔求陳氏後。復立爲安南國王。國人言。黎賊殘陳氏無後。乃郡縣其地。立交趾布政使司。都指揮使司。按察司。分十七府。曰交州。北江。諒江。三江。建平。新安。建昌。奉化。清化。宣化。大原。鎮蠻。諒山。新平。乂安。順化。升華。四十七州。一百五十七縣。衛十一。所三。市舶司一。改鷄陵關爲鎮夷關。安撫人民三百二十萬。獲蠻人二百八萬七千五百。糧儲一千三百六十萬石。象馬牛十三萬五千九百。船八千七百。軍器二千五十三萬九千。勅黃尙書兼掌布按二司事。勅輔晟。僞交趾。應有懷才抱德。山林隱逸。明經能文。博學有才。賢良方正。孝悌力田。聰明正直。廉能幹濟。練達吏事。精通書算。明習兵法。武藝智謀。容貌魁

偉。語言便利。膂力勇敢。陰陽術數。藥醫方技之人。悉心訪求。禮送京師。擢用。九月。輔遣升。露布獻俘。季鞏。蒼及僞將相下獄。赦澄。莠等。令有司衣食之。陞柴胡等。指揮使僉事千戶。是冬。贈故安南國王陳氏子孫七人官。六年七月。進封輔爲英國公。晟黔國公。封升安遠伯。八月。交人簡定。鄧悉反。以晟爲征夷將軍。帥師討之。僞仍參贊。十二月。晟與賊簡定。戰於生厥江。敗績。僞都督呂毅。交趾參政劉昱。皆沒。七年二月。勅輔總兵討賊。言晟出師失律。致賊猖獗。今聞鄧悉死。而八百媳婦老搗。猶供饋者何人。賊云有象五萬。又謂我將帥皆易與。宜戒慎。同心協力。早滅此賊。五月。簡定稱上皇。立陳季擴爲大越皇帝。改元重光。八月。輔敗賊于鹹子關。九月。又敗之太平海口。十月。季擴稱故王後。請封。輔不聽。進兵至清化。十一月。輔獲簡定及其僞將相。八年正月。召輔還。令晟節制諸軍。簡定檻至京。伏誅。十二月。季擴人上表請降。遣方通政。諭季擴。以爲交趾右布政使。又以其黨陳原樽爲參政。胡具澄。景異。鄧鎔。都指揮。潘季祐。按察副使。是月。

季擴。景異復反。九年正月。以輔爲征虜副將軍。總兵。會征夷將軍晟。率師討之。二月。詔赦交趾。七月。輔晟敗賊于月常江。十一月。輔率舟師。破賊于海上。十年八月。又破賊于神投海口。十月。又破賊西心江。十一年十二月。輔晟會兵。敗賊于愛子江。擒季擴。十二年八月。檻至京。伏誅。十三年四月。以輔爲征夷將軍。總兵。鎮交趾。十四年十一月。召輔還。豐城侯彬代輔。十六年正月。清化土官巡檢黎利反。侯彬遣都督朱廣。往勦之。利初從季擴。爲金吾將軍。已而來降。令爲土巡檢。輔還。遂反。稱平定王。以弟黎石爲相國。段莽都督。聚賊。炭范柳。范晏等。肆出劫掠。廣兵至。斬首六百。擒晏。利遁去。彬請就交趾。戮晏等以徇。七月。交趾右布政使莫勛及交州知府杜希望。令縣丞黎獻。率家人五百。力役北京。十七年。巡按御史黃宗載言。交趾新入版圖。勞來尤在得人。今府州縣多兩廣雲南歲貢生及下第舉人。未入國學。乞仕遠方。遂授以職。既乏大學教養之素。又非諸司歷試之才。以故牧民者不知撫字。理刑者不諳法律。若候九年黜陟。廢弛益

多。宜令到任二年以上者。從巡按御史及布按二司嚴覈其廉汙能否。上狀黜陟。從之。十八年五月。勅侯彬。叛寇黎利。潘僚。車三農。文歷等。迄今未獲。未審兵何時得息。民何時得安。宜盡心畫方略。早滅此賊。交趾參政侯保。馮貴。討賊戰死。十九年五月。彬請屯田。九月。彬言。利奔老撾。我進兵討捕。老撾輒遣頭目覽耆郎。阻我兵勿入境。云卽發兵象。大索利。送軍門。久之。竟不獲利。上曰。老撾匿賊。持兩端。令彬遣頭目至京。詰之。是冬。赦利。以爲清化知府。遣內官山壽。諭利。二十二年。仁宗卽位。召福還。以洽爲兵部尙書。代福。是冬。交趾參將保定侯瑛。榮昌伯智言。壽未至。利復反。改大理寺卿楊時習爲按察使。以弋謙爲布政使。內官馬騏。自交趾召還。未幾。矯旨下內閣書勅。復往交趾。開辦金銀珠香。內閣覆請。上正色曰。朕安得有此言。此奴曩在交趾。荼毒軍民。卿等獨不聞乎。自騏召還。交人如解倒懸。豈可再遣。然亦不誅騏也。洪熙元年二月。以智爲征夷副將軍。總兵討利。六月。宣宗卽位。七月。命行在兵部侍郎戴綸。副洽。贊理智軍務。

八月。賊阮可郎等伏誅。十一月。勅智及安平伯安。都督方政及三司。賊利包藏禍心。已非一日。始若易取。誤信人言。惟事招撫。迄今八年。終不聽命。忠臣罹害。良民被毒。其誰之過。智等其急進兵。務協和成功。來春不捷。論罪。是月上。欲棄交趾。問英國公輔。尙書義原吉。皆曰不可棄。問內閣士奇榮。皆頓首稱善。宣德元年三月。智政兵討利。進至茶籠州。敗績。四月。以成山侯通。爲征夷將軍總兵。都督馬瑛。參將討賊。尙書洽仍參贊軍務。安平伯安。掌交趾都司事。削智政官爵。五月。赦交趾。十一月。通擊賊。敗績。十二月。賊攻清化州。不利。引去。以安遠侯升。爲征虜副將軍總兵。保定伯銘。左副總兵。都督崔聚。右參將。由廣西。黔國公晟。爲征南將軍總兵。興安伯亨。左副總兵。新寧伯忠。右副總兵。由雲南。率兵兩道討賊。兵部尙書李慶。參贊軍務。工部尙書兼詹事黃福。仍掌交趾布按二司事。勅通守城練兵。候升等至進兵。二年正月。上念久用兵勞費。又問大臣。士奇榮力贊上止兵。棄交趾便。利攻交趾城。通等出戰。敗之。斬僞司徒司空太尉少

尉太監黎笏等。四月。利陷昌江。通斂兵不出。賊書與通請和。通遂許。清化諸州地與賊。遣指揮闕忠與利所遣人。上表貢方物。七月。賊破隘畱關。圍丘温。鎮遠侯興祖擁兵南寧。不肯援。城陷。逮興祖。九月。升等師至隘畱關。利遣人詣軍門上書。言窮迫。乞罷兵。立陳氏後。升易賊。賊伏四起。升中鏢死。是日。銘病卒。明日。慶亦卒。聚兵亦敗。諸將兵皆阻賊不得進。十月。通出下哨河。立壇與利盟。約退師。且宴利。遺利金織文綺。利亦以重寶謝通。是月。忠及利所遣人至京。表以陳暉爲名。實出利。上覽表。示羣臣曰。賊表乞復立陳氏後。從之便。抑不從便。羣臣以內閣主議。故皆曰從之便。上曰然。十一月。以行在禮部侍郎李琦。工部侍郎羅汝敬。充正使。通政黃驥。鴻臚卿徐永達。副使。詔諭安南言。利表言前國王遺嗣暉尙在老撾。國人乞封暉王。永奉職貢。頭目耆老。其以實對。朕卽遣使授封。朝貢如洪武故事。又勅通等。卽日班師。內外鎮守三司衛所府州縣文武吏士。攜家來歸。三年正月。通馳奉僞王陳暉。遣黎少穎表貢代身金銀人謝罪。并送

我叛人都督都指揮蔡福等還京。乞班師。臣兵寡援絕。人情警懼。賊控據水陸。陷奪城池。臣與眾議。不如因其納貢請降。全師出境。再圖後舉。臣已率將士還至南寧。俟命。上覽奏。勅通。虧損臣節。遺笑蠻方。如國體何。三月。少穎至京。表稱安南國先陳王臣暉三世嫡孫。臣暉及頭目臣黎利云。四月。通至京。羣臣劾通及瑛智安政。布政使弋謙。內官山壽。馬騏等。下廷鞫。言通等失律。喪師棄地。壽曲護叛賊。騏激變藩方。論死。繫詔獄。籍其家。瑛等坐罪有差。興祖亦下詔獄。五月。琦。汝敬等還。利遣人表謝。言暉會病卒。族人並絕。國中推利守國。候命。汝敬永達復奉詔。諭利及耆老。訪陳後。聞羣臣又劾。晟亨忠奉命。與升。掎角進兵。顧逗遛逾時。方臨賊境。與升等聲聞斷絕。賊得專力拒我。及聞升陷沒。又不進援。通等輒狼狽引退。爲賊所乘。殺傷吏士。委棄鎧仗。賊勢益橫。城池失守。乞亟正邦刑。上曲赦晟。令臺中緘劾章。示晟亨忠。俟還京論罪。贈交趾死節都指揮李任。指揮顧福。劉順。徐騏。周安。千戶蔡顛。桂勝。知府劉子輔。易先。知州何忠。內官

馮智等官。武官世職。文官復其家。誅叛臣蔡福等。籍其家。四年二月。汝敬等還。利遣人貢方物。三月。遣琦。永達。行人張聰。勅諭利。三月。琦等還。利遣人貢金銀。鉅器方物。并上國人奏。言陳氏無後。利撫綏有方。得民心。乞令管攝。永爲藩臣。奉職貢。六年五月。利遣人陳情謝罪。貢方物。六月。遣行在禮部侍郎章敞。通政徐琦。詔利權署安南國事。七年二月。敞等還。利遣人貢謝。八年八月。利遣人入貢。九年三月。廣西總兵山雲言。利死。長子狂妄。次子幼弱。姦臣黎問。黎察。構黨相讐殺。夷民驚懼。諒山土官阮世寧。七源土官阮公廷。率眾避難來歸。願居廣西龍州及太平府上下凍州。勅雲。利本起微賤。因奏立嵩。從人望。朕志在息民。遂詔罷兵。徐議立嵩。利遽奏嵩死。嵩之死。利所爲也。朝廷卽欲問罪。不忍毒民。令權署國事。多行不義。爲天所殛。爾戒飭邊兵。嚴謹守備。勿忽。世寧。公廷。可善撫之。四月。琦等還。言利死。利子麟。遣人告喪。獻金人方物。五月。遣行人郭濟。朱弼。祭利。十月。麟令人上表請命。遣敞及行人侯璉。諭麟。仍權署安南國事。十二

月。欽州貼浪如昔人叛。降麟。正統中。麟卒。子濬嗣。天順中。濬被篡。弟灝嗣。弘治中。灝卒。長子暉先卒。子誼嗣。正德初。誼被篡。國人請以灝庶子暲嗣。朝廷登極。改元。遣使詔諭。交酋亦數遣使朝貢。然時時南侵占城。占城上聞。諭禁之。輒陽聽命。侵盜如故。已而中國人多潛入交南。至有受僞御史者。教之窺伺雲南。太監錢能貪殘。令京衛指揮郭景。矯奉勅旨。往來交南。獵夷奸闖出入。莫敢誰何。遂誘我逋逃。覘我虛實。鎮南關外。類多華人。而臨安諸郡。所在有夷賊矣。於是撫臣屢請增置文武吏士。控制彈壓。然交人侵奪欽州里社。我亦不能禁。是時。暲弱懦無爲。境內盜起。羣下專權。虐政暴征。人不堪命。正德十年。暲遣阮仲達朝貢。是年。陳暠作亂。殺暲。奸酋莫登庸及其子方瀛。結黎義昭等。共推暲從子。諱嗣。而討殺陳暠。嘉靖改元。遣使詔諭。暲且死七年矣。諱不請封。輒改元光紹。暠父子亦據諒山等府。稱王。改元天應。莫登庸妻灝妻。逼諱走海濱。使命不能達而還。當是時。登庸遂與陳氏分據交地。杜溫閏。鄭綏。不肯從登庸。已而諱

死。登庸又曰。灝有子廡。諱弟也。矯立廡。相拒。交人曰。灝死久矣。廡本登庸子。諱同母弟也。嘉靖初。田州岑猛叛。兩廣總督姚鏌計鳩殺之。謂岑氏可遂滅。疏請設流官治田州。而盧蘇王受諸孽。輒通交南。流言搖惑滇嶺間人。鏌被論落職。桂萼初嚮用言。提督兩廣。非新建伯王守仁不可。遂起新建伯。兼兵部尙書。總制兩廣江湖諸省軍務。新建伯至嶺南。始知流官不可設。請復官猛子邦相爲田州判官。盧蘇亦與土巡檢羈縻之。尋新建伯病。謂翁萬達曰。田州事非我心。後世誰諒我者。新建伯初起用。皆萼之力。萼議禮致位卿輔。欲立奇功。會安南有亂。冀可傳檄取之。乃陰以意寓書。授新建伯。若專爲思田者。使密探安南要領。而新建伯不答。直於奏尾稍及之。萼遂恚憾。會新建伯卒。竟中傷。革世爵。及卹典云。嘉靖十五年。哀冲太子生。頒詔諸夷禮官言。安南久不庭。不必遣使。請發兵討之。下廷議。諸大臣不可。勅錦衣衛官使安南。察之。已而又遣禮部尙書黃綰。翰林學士張治。使安南。時車駕巡承天。綰治行有日。又復止。兩廣守臣

言。安南莫氏篡逆。國內大亂。時出侵掠。遂命兵部尙書毛伯溫。至廣東議方略。進兵討莫氏。會莫氏請命。嶺南知府廉州張岳。梧州翁萬達。廣州鄒守愚及巡撫諸臣。亦不欲用兵。騷動數省。條議上伯溫。請赦莫氏。以爲安南都統使。會登庸死。伯溫請以制命授其孫福海。嘉靖二十年六月。班師論功進秩。賞賚有差。未幾。福海復爲黎寧所逐。黎氏仍據國。莫氏竄居南海島上。朝廷置不問。交趾東起欽州。西歷左江。北至臨安。元江。龍州。其孔道。憑祥其要害也。由臨安經蒙自。河蓮花灘。至其東都。可四五日。其俗。夷獠雜居。不知禮義。獷悍喜鬪。不解耕種。椎髻剪髮。好浴善水。平居不冠。惟交愛人。個儻好謀。驩演人淳秀好學。其山川佛跡勾漏海。富良江爲大。產金珠珊瑚瑁丹珠。香蘇合油胡椒羚羊角犀象咒白鹿猩猩狒狒白雉翡翠蚺蛇蟻子鹽鹽波羅蜜烏木蘇木。境內有越王城。天使館。浪泊柱。銅鼓。

兀良哈。兀良哈。在烏龍江南。漁陽塞北。春秋時山戎地。元爲大寧路。戶四萬。

六千。口四十四萬八千。國初。割錦義建利諸州。隸遼東。設都司於惠州。領營與衛二十餘衛所。所謂北平行都司也。洪武十四年。封子權於大寧。爲寧王。二十二年。分兀良哈爲三衛。於橫水之北。曰朶顏。曰福餘。曰大寧。處降胡。以脫魯忽察兒海撒男奚阿札失里爲三衛指揮使同知。並邊爲我藩籬。靖難初。首劫大寧兵。及召兀良哈諸酋。率部落從行。有功。遂以大寧畀三衛。寧王移封南昌。徙行都司於保定。爲大寧都司。令三衛歲二貢。貢衛百人。東起廣寧前屯。歷喜峰。近宣府。爲朶顏。自黃泥窪。逾瀋陽鐵嶺。至開原。爲福餘。由錦義度遼河。至白雲山。爲大寧。皆逐水草。無恆居。三衛。朶顏最強。分地又最險。永樂中。最親附。宣德時。嘗入漁陽塞。上率諸將。出喜峯關。敗諸虜于寬河。誅其大酋。自後稍馴順。正統中。又叛。侵盜東北關諸寨。索鹽米賞賜而已。以故喜峯密雲間。有都指揮或都督鎮守。驗貢夷。己已福餘。大寧結也。先爲也。先鄉道。朶顏獨扼險不肯從。也先至。不能入塞。不得利。大掠福餘。大寧人畜去。始勅都御史鄒來學經略。己而

設太監參將。又設總兵。景泰四年。守臣言。兀良哈貢使。往來不絕。爲瓦剌間諜。詔自後使至。伴二三人入京。餘不得輒入關。成化四年。與北虜毛里孩通。侵天城。遣都督李鐸詰之。十二年。通虜加思蘭。謀寇遼東。勅邊臣備之。然亦未敢大爲寇盜。弘治中。守臣楊友。張瓊。燒荒出塞。掩殺邊蠻。遂起。正德初。部落旣蕃。陽順陰逆。累肆侵盜。朶顏都督花當求添貢。其子把兒孫。深入擄掠。動稱結親。迤北。恐中國。革蘭台者。花當孫也。兀良哈。朶顏爲大部。朶顏花當爲貴種。花當長子。革列孛羅早死。其弟把兒孫。驍勇。十年。把兒孫入馬蘭谷塞。殺參將陳乾。遣都督桂勇討之。把兒孫遣扯禿等來言。請入貢。且獻馬。贖殺乾罪。又謾言射林孛羅。斡兒路阿刺忽。旦夕且糾諸部。大舉入寇。令小失台。呼扯禿等去。我亦幸無事。奏虜退班師。未幾。入寇。參將魏祥全軍覆沒。時把兒孫狡劣。屢謀奪適。諸酋惡之。不相附。尋亦死。花當種人。皆附革蘭台。革蘭台貢馬。遲之未請。嗣番官也。邊臣言上。兵部令譯部落後。許貢。革蘭台遂入寇漁陽。諸小關堡皆殘破。嘉

靖十一年九月。巡撫王大用。欲通朶顏。與厚賂。城其霧靈山。不果。是時。酋阿堆。哈利赤。數入建昌喜峯太平諸塞。殺掠人畜。革蘭台又乞陞官。兵部言。大用喜事。請以毛伯溫代。大用出漁陽巡撫。伯溫至。鎮虜益盜邊。邊人不得耕牧。二十年。革蘭台挾北虜。求添貢。貢衛三百人。不許。請衛二百人。又不許。時時出沒塞下。輒云。結小王子。旦夕大舉入塞。會俺答吉囊。自大同深入大原。不得已。許其補前貢。失期者衛二百人。二十一年。內批胡守中。侍郎兼憲職。提督軍務。撫勦守中。儉險嗜利。乾沒內帑金多。又擅出塞。盡伐遼金以來松木百萬。自撤藩籬。徧索富人。舊將領金錢。言官劾守中。論死西市。巡撫徐嵩。阿事守中。削籍。已而有發嵩乾沒庫金者。逮謫戍。二十二年。叛人白通事道虜。數侵我塞。巡撫許論。伏兵。斬白通事。論進官。副都御史。請告去。朱方代論。以請撤防秋兵太早。爲虜所掠。逮至京。杖死闕下。職方郎中韓勗。亦杖死。方清勁。勗端諒。皆有才識。死非其罪也。二十五年。虜大入塞。明年。北虜道兀良哈。入寇遼東。兀良哈又結海西。

建州夷。出入遼東西塞下。

朝鮮。朝鮮。周封箕子國也。秦遼東外徼。漢初爲燕衛滿所據。武帝取爲眞番。臨屯。樂浪。玄菟四郡。漢末爲公孫氏所據。魏滅公孫。晉并於高麗。高麗本扶餘別種。王高璉居平壤。卽樂浪。已而東徙鴨綠江東南千餘里。後唐時。王建代高氏。并有新羅百濟。又徙東松岳。以平壤爲西京。子孫遣使朝貢。宋遼金。歷四百餘年。元至元中。西京內屬。置東寧總管府。洪武二年。王王顥表賀卽位。遣符寶郎嚶斯。賜金印。誥命大統曆金綺。封爲高麗國王。并賜王母妃相國諸陪臣文幣。五年。王顥遣其禮部尙書吳季南。民部尙書子溫。表貢方物。表言暹羅國者校亦註暹羅疑恃其險遠。不奉朝貢。蒙古人畱居其國。宜徙之。蘭秀山逋逃所聚。亦恐爲寇患。乞發兵討之。賜璽書言。暹羅隸爾國。蒙古亦人類。蘭秀山逋寇。示以朕詔。一呼可至。勿用兵便。十年。以高麗貢使煩數。遣故元樞密使延安答里諭意。顥遣門下贊成事姜仁裕表謝。貢方物。上令賀正。且使金潛及仁裕偕還。賜



都評議司奏至。奏言。恭愍王薨。無嗣。李仁人以他人子禡主國事。昏暴好殺。謀侵遼東。大將李成桂力阻乃已。禡自知負罪。遜位於子昌。國人弗順。啓恭愍王妃安氏。擇立宗親定昌國院君王瑤。權國事。及今四年。昏迷信讒。其子奭亦癡騷。縱酒色。與禡黨玄禹實等。謀復禡位。守門下侍中鄭夢周。曲附王瑤。謀害成桂及趙俊。鄭道。傅南閭等。今年七月。國中臣民。以安妃之命。退瑤於私第。擇于宗親。無可立者。眾推門下侍郎李成桂。主國事。上曰。朕中國綱常所在。列聖相傳。守而不失。高麗限山隔海。僻處東夷。非我中國所治。且事多隱曲。不可據信。令禮部移文。從其自爲聲教。成桂更名且。徙居漢城。遣使請更國號。詔更號朝鮮。且遣使請印誥。上覽表。怪且不遜。詰使者言。表鄭集撰。上盡卻方物。索集。且懼。送集至京。安置雲南。二十七年。令遼東絕朝鮮。二十九年。請印誥。不許。三十一年。府部請發兵討朝鮮。不許。且老。請子芳遠嗣。且卒。謚康獻。永樂元年。賜金印誥命冕服九章圭玉佩玉。列女傳春秋會通大學衍義通鑑綱目諸書。

十七年。芳遠老。請子禴嗣。芳遠卒。諡恭定。宣德初。賜禴五經四書性理大全通鑑綱目。五年。禴遣使獻海青鷹。使還。賜王磁器。諭禴王。國中多珍禽異獸。然朕所欲不在此。後勿獻。自後聖旦元日。皆使朝貢。王請封慶弔謝使來無常期。朝廷有大政。頒詔其國。及王請嗣封。皆遣使。正統間。賜王遠遊冠絳紗袍翼善冠龍袞玉帶。景泰元年。禴卒。命子珣嗣。珣卒。賜諡恭順。命子弘暉嗣。弘暉幼。叔瑛以讓位請。七年。封瑛爲王。瑛後不知幾傳。而娶立。正德元年。娶卒。諡康靖。子懽立。踰年而世子顛卒。懽病風。遜其弟懽。正德二年。懽立。十五年。封子崑爲世子。嘉靖二十三年。懽卒。二十四年。崑立。未踰年卒。二十四年。崑弟頤立。三十六年。封長子顛清爲世子。頤疏乞改大明會典中所載成桂篡逆事。從之。其國東西南濱海。北鄰女直。西北至鴨綠江。東西相距二千里。南北四千里。分八道統府州郡縣。俗柔謹。知文字。喜讀書。崇釋尙鬼。惡殺。戴折風巾。服大袖衫。男女相悅爲婚。死三年始葬。飲食用俎豆。官吏閑威儀。居皆茅茨。衣多麻苧。以田制俸。以

稊醞酒。法無苛條。刑不慘毒。山川丸都神嵩北岳。海鴨綠江爲大。產金銀鐵水晶鹽。紬苧布白。硨磲紙。狼尾筆。果下馬。長尾雞。貂納海豹皮。八梢魚。昆布。稊黍。麻榛。松人參。茯苓。

琉球。琉球在海東南。自福建梅花所開洋。順颶利舶。七日可至。漢魏至唐宋。

不通中國。隋嘗遣兵。虜其男女五千人。元遣使招諭。竟不從。洪武初。國分中山。

山南。山北。稱三王。遣使朝貢。十五年。賜中山王察度。山南王承宗。校者註承宗疑承察度之

焉鍍金銀印金幣。使還言。二王爭雄相攻。賜詔諭之。并諭山北王怕死芝。校者註怕者

死芝疑怕尾芝之譌十六年。賜山北王印文綺。王妃姪相寨官各有差。二十五年。中山遣

子姪及其陪臣子弟入國學。上喜。禮遇獨優。賜閩人三十六姓善操舟者。令往

來朝貢。永樂二年。察度卒。詔封其世子武寧嗣王。是年。山南王承察度卒。無子。

令其從弟汪應祖攝國事。應祖使來請命。如山北王故事。諭塞尙書。遣使賜應

祖冠服。嗣山南王。九年。中山王思紹令坤宜堪彌貢馬及方物。以其長史程復

來見。表言。長史王茂。輔導有年。乞陞國相。兼長史事。又言。復本中國饒州人。輔臣祖察度四十餘年。不解于職。今年八十有一。乞令致仕還其鄉。上從之。陞復琉球國相兼左長史。致仕還饒。茂國相兼右長史。景泰元年。中山王尙思達遣人朝貢。三王嗣封。皆請於朝。已而山南山北。爲中山所并。中山遣使朝貢。令三年一貢。貢無過百五十人。察度後五傳至尙圓。嗣王卒。子尙眞嗣。嘉靖十一年。尙眞卒。子尙清請嗣。遣左給事中陳侃。行人高澄。以太牢祀眞。封清嗣王。賜王妃冠服錦幣。使臣疏言。弘治正德時。修譔羅倫等。嘗使安南。安南乞畱詔勅。爲鎮國之寶。倫爲請得畱。卽琉球請畱如安南。海外遠。不得卽請。乞下禮官議。議請如安南。使至國。授封。王拜曰。天朝詔勅。藏金匱者八葉于茲矣。請畱。使許之。比還。遣其王親寧吉。長史蔡瀚。上表謝。使上使琉球錄。言大明一統志中。載琉球有落漈。王居壁下。聚蠲體。非實事。杜氏通典。集事淵海。蠲蟲錄。星槎勝覽所述。亦皆傳者妄也。乞下史館。從之。其俗。以盈虛爲晦朔。以草木爲冬夏。人皆去

髭黥手。羽冠毛衣。無禮節。好剽掠。既遣人學於國學。夷習稍變。奉正朔。設官職。被服冠裳。陳奏章表。著作篇什。有華風焉。今其國中。王下有王親。不與政。次法司官。次察度官。司刑名。次那霸港官。司錢穀。次耳目官。司訪問。皆土官。爲武職。以上世及所轄地爲姓名。其大夫。長史。通事官。司朝貢。有定員。爲文職。皆三十六姓人及學於國學者爲之。王并日視朝。且中昃。凡三朝。羣臣搓手膜拜。尊且親者。入殿坐飲酒。卑疏者移時長跪階下。歲元日。聖節。長至。君臣冠服。拜龍亭祝慶。子爲親喪。數月不肉食。人死。以中元前後日。浴尸溪水。去腐肉。取骨。纏以布帛。裹葦草。埋土中。王及諸臣家匣骨。藏山穴。斂木爲小牖。歲時祭掃。啓視之地。無貨殖。不通商賈。朝貢乘大舡。海上漁鹽。泛小艇。無竹筏。信鬼畏神。神以婦人爲尸。號女巫。女巫之魁。稱女君。白日呼嘯。聚輒數百人。攜枝戴草。騎步縱橫。時入王宮。褻遊狎戲。一唱百和。音聲悽慘。倏忽往來。莫可踪跡。馮附淫昏。矯認禍福。王及世子陪臣。皆頓首拜跪。王居山巖。國門名歡會。府門漏刻。殿門奉神。

朴素。無金碧之飾。賦法略如井田。王臣民各分土爲祿食。上下爲征斂。有事一取諸民。事已卽已。用刑甚嚴。盜竊卽剗。家富貴者瓦屋。不過二三楹。餘皆茅土。風雨飄搖。以螺殼鑿。鑿無釜甑。耕無鐵。婦人嚼米爲酒。男子煮海爲鹽。市用日本錢。十當一。如宋季。鶩眼。縱貫。人無貴賤。皆驍健。耐勞苦。饑寒。不知醫藥。而無疾疫。兵甲堅利。射可至二百步。進止有金鼓。鄰國視爲勍敵。然好爭。很鬪。輒刃殺人。度不能脫。卽剖腹自斃。其山川。鼇鼉嶼。澎湖島爲大。或曰。國西古米山。有礁甚險。舟至輒敗。卽落滌也。產馬。海巴牛皮磨刀石。硫黃銅錫扇。山無猛獸。以故多野馬牛豕。鬪鏤木。蘇木。胡椒。諸香。非其產也。又有小琉球。近泉州。閩人言。霽日登鼓山。可望而見。入國朝。未嘗朝貢。或曰。并入琉球。琉球旁有毗舍那者。島中小夷。鳥語鬼形。袒裸。眈眈。殆非人類。不通中國。

女直。女直。古肅慎氏。在混同江東。東瀕海。西接兀良哈。南鄰朝鮮。北至奴兒干。其地有長白山。橫亙千里。高二百里。巔上有潭。周八十里。南流爲鴨綠江。北

爲混同。混同江在開原城北千五百里。又有松花江。在開原城東北千里。黑龍江在開原城北二千五百里。與混同皆南入松花。元設諸府路。領混同江南北水達達及女直人。明興遣人招諭。永樂九年春遣將。將水軍。駕巨艦至江上。召集諸酋豪。餌以官賞。於是東旺佟答刺哈王肇州瑣勝哥四酋率眾降。始設奴兒干都司。以四酋爲都指揮。賜勅印。又置衛所三百八十二。官諸小酋爲指揮。千百戶。鎮撫。又有地面五十八站。七寨。一皆令三歲朝貢。官賞羈縻之。又置馬市。開原城。通交易。稍給鹽米布。贍諸酋豪。使保塞。不爲邊寇盜。各路有水陸城站。自湯站東抵開原。曰建州。毛憐。海西。野人。兀者。皆有室廬。建州最強。開原北近松花江者。曰山夷。又北抵黑龍江。曰江夷。亦有室廬。江夷爲強。建州毛憐。本渤海氏遺孽。喜耕種。善緝紡。飲食衣服。頗有華風。海西有山夷。卽熟女直。完顏餘種。亦務耕稼。婦女喜金珠。倚山作寨。亦名山寨夷。江夷居黑龍江。卽生女直。數與熟女直讐殺。百十戰不休。諸夷皆善射。馳獵好盜。建州夷尤善治生。其左

右二衛。最無賴。江夷以北。有阿哈婁得。悍狡。自相雄長。大抵東北諸夷。建州處要害。居中。與諸夷勢聯絡相犄角。五嶺喜昌石門險隘。人騎不得成列。虜人視爲咽喉。永樂閒。開原降虜楊木答戶者。率數百騎。奔建州。已而建州酋李滿往款塞。求內附。駐牧蘇子河。日強盛。靖難未久。專事撫綏。桀驁漸爲邊患。一歲閒入寇者九十七。殺虜吏民十萬餘。正統末。附也先入塞。侵遼東西。景泰中。諸酋多死。也先之亂。盡失賜勅。諸子孫不得請官。以舍人入貢。賞宴大減。以故怨忿思叛。成化二年。酋董山遂糾眾入寇。三年。武靖伯趙輔充總兵。都督王瑛封忠爲副。左都御史李秉督軍。率漢番京邊官軍五萬討之。山降。送京師。放歸廣寧。輔秉曰。山不可宥。請誅山。九月。分左軍出潭河柴河。越石門土木河。至分水嶺。右軍由鴉鵲關喜昌口。過鳳凰城黑松林摩天嶺。至潑豬江。中軍自撫順。經薄刀山鮎魚嶺。過五嶺。度蘇子河。至虎城。期日會兵進剿。朝鮮亦遣中樞府知事康純。魚有。沼南怡。率兵萬人。遏其東走。我兵擣賊巢。虜遁。擒斬俘獲虜指揮若

女等千人。班師。指揮張額的里。率妻子乞降。朝廷憐而釋之。明年。畱韓斌爲副。總兵防守。築撫順清河。變陽諸堡。未幾。諸夷憤欲報山讐。相約入寇。十四年。入塞。殺掠人畜無算。巡撫陳鉞掩降虜爲功。又附太監汪直。開邊隙。出塞撲殺諸夷。諸夷益恨我。大入塞。殺掠吏民。遣兵部侍郎馬文升。反直撫勦。直倖用事。幸功。陰爲鉞地。要文升偕行。文升弗聽。疾馳至鎮。撫定黑鎖忒諸酋。比直至。虜已解散。直大怒文升。還奏。文升妄啓邊釁。謂女直建州諸虜。皆以文升曩在鎮。禁不與易農器。故屢寇塞。上遣直及刑部尙書林聰。卽訊遼東。報上。盡如直言。下文升詔獄。文升言。實禁鐵器。非農器。不聽。竟謫戍重慶。已而直敗。貶內使南京。鉞亦敗。下詔獄。文升得雪。復官致仕。正德八年。海西加哈義叛。嘉靖二十四年。巡撫於敖。減賞物。夷人大譁。不能拊順。詐殺諸譁酋。夷人大恨。數入塞。殺掠大慘。胡宗明代敖。不能禦。降浙江參議。二十七年。大虜通兀良哈諸女直。入遼東。代宗明巡撫李珏。又論罷。遼東西大困。產楛矢石。斲赤玉眞珠金麻布鹽馬黃。

狃虎。羆。狐狸。海上有海豹。驢。獾。猪。羊。狗。野有野猪。牛。驢。貂。鼠。青鼠。失刺。孫。好。刺。殊角。殊角即海象牙。魴鬚。鯨。晴。海。東。青。鷹。鷄。鴉。鶻。鶻。鱈。牛。魚。粟。麥。稜。三佛齊。三佛齊。即舊港。又名淳淋。在東南海中。本南蠻別種。初隸爪哇。有地十五州。東距爪哇。西距滿刺加。南距大山。西北濱海。番舶輻輳。多廣東漳泉人。土沃宜稼穡。人好賭博。習水戰。服藥。刀不能傷。遇敵敢死。鄰國畏之。水多土少。將領得居陸。民率架筏水中。架梁柱。語言如爪哇。市用錢布。字用梵書。其屬有單馬令。凌牙斯。蓬豐。登牙。儂。細。蘭。諸國。洪武初。王恒麻沙那阿。稱臣入貢。四年。遣玉的力馬罕。亦里麻思。奉金字表朝貢。賜大統曆文幣。六年。使來貢。八年。使從我。招諭拂菻。十年。恒麻沙那阿卒。賜王子麻那者巫里。三佛齊國王印。印駝鈕。銀質鍍金。是時。廣東有陳祖義者。脫罪避居其國。久之。得爲將領。暴橫掠過客。永樂中。太監鄭和。統海舶下西洋。至三佛齊。有施進者。祖義鄉人也。訴于和。和擒殺祖義。承制官進。仍畱舊港爲將領。進沒。女嗣官。產鶴頂火雞。神鹿。金銀。

水晶珠璫琉璃珊瑚犀角象牙龍腦諸香猫睛石薔薇水阿魏沒藥血結鶴頂鳥大於鴨。腦骨厚寸餘。外黃內赤。鮮麗可愛。火鷄大於鶴。頸足亦似鶴。軟紅冠。銳觜。毛如青羊色。爪甚利。傷人腹致死。食炭。神鹿大如巨豕。高可三尺。短毛。豕喙。蹄三跖。

占城。占城。古越裳。秦林邑。漢象林。漢末。區連殺縣令。自稱林邑王。遂不入版圖。唐元和初。改號占城。宋淳熙中。龔破真臘。慶元中。真臘復讐。俘殺幾盡。更立真臘人爲主。洪武二年。遣吳用。顏宗魯。楊載等。使占城。爪哇。日本等國。賜王璽書。是年。遣使蒲且麻都朝貢。言安南侵境。上遣使招諭安南罷兵。是年。國主阿答阿者。遣虎都蠻來朝。貢虎象。遣中書省管勾甘桓。會同館副使路貢賢。封阿答阿者。爲占城國王。賜大統曆金綺。四年。阿答阿者。遣答班瓜卜農。奉金葉表朝貢。言安南數侵境。乞賜兵器樂人。俾安南知我乃聲教所被。輸貢之地。不敢輒欺負。上憐之。命中書省咨王。言交鄰有道。事上以誠。占城安南。既皆臣事朝

廷。豈可擅兵相毒。卽咨安南。令其罷兵。兵器不爾吝。但以安南故賜爾。是助爾構兵也。樂器有聲律。華夷方言本異。中國人不可遣。遣爾國人能習華音者。來習肄。十六年。遣子來賀聖節。賜勘合文冊。二十四年。使至。以臣弒君故絕之。永樂四年。王占巴。鎖里人。勅王的賴。得黎賊父子及其黨惡。卽械送京。尙書陳洽。在南交軍中馳奏。占城國王占巴的賴。奉命出兵討安南。陰懷二心。愆期不進。及進。至化州。輒肆虜掠。又以金帛戰象。資季擴。季擴亦以黎蒼女。遺之。復約季擴。身陳翁挺等三萬餘人。復侵升華府隸四州十一縣地。驅掠人民。罪下季擴一等耳。請發兵討之。上以交趾初平。不欲窮兵遠夷。遣使諭王。歸我侵地。永樂後。遣人朝貢。令三年一貢。正統六年。國人請封其嗣王。遣使冊封。成化中。遣使冊封。正使率海上。副使論罪戍邊。其國在大海南。南距眞臘。西距交趾。東北際海。自閩長樂五虎門西南行。順風可十日至。東北百里海口。立石塔爲標。舟至是繫焉。俗獷悍。果于戰鬪。尙釋教。王冠三山金花玲瓏冠。衣白。跣足。乘象或黃。

犢車。臣菱葉冠。男蓬頭。女後椎結。所居茅茨不得踰三尺。衣紫衣。衣玄黃罪死。出入乘象馬。粒食亦鮮食。殺牛祭鬼。驅象逐邪。市用金銀。焚衣祭天。釀酒甕中。俟熟。賓主繞甕坐。筒而輒。且輒且注水。味盡而止。文書用羊皮及黑木皮。無閏月。晝夜各分五十刻。王當賀日。沐人膽汁。將領獻人膽爲賀。王在位三十年。卽入山。茹素受戒。令子姪攝國。居一歲。籲天矢曰。我不道。當充虎狼食。或病死。朞年得無恙。復入爲王。於是國人呼爲芳嚟馬哈刺札云。有號屍致魚者。婦人也。目無瞳。夜飛頭入人家。食小兒。穢氣侵兒腹。兒卽死。頭返。合體如故。失其體。不得合。卽死。夫不聞者罪之。產金銀錫鐵獅象犀牛瑇瑁諸香朝霞大火珠菩薩石薔薇水猛火油檳榔諸文異木胡椒白藤吉貝絲絞白氎布孔雀山雉。伽南香惟此地有之。價亦高。觀音竹如藤。長丈八尺許。色黑如鐵。寸二三節。犀角象牙最多。犀如水牛。大者八百斤。體黑無毛。蹄有三跖。獨角在鼻端。長者可尺五寸。馬小於驢。波羅蜜。形如東瓜。

日本。日本。古倭奴國。海中諸夷。倭奴最大。西南至海。東北大山。國主世以王爲姓。羣臣亦世官。地分五畿七道三島。又有附庸國百餘。拘邪韓最大。其國小者百里。大不過五百里。戶少者千。多止一二萬。皆倭種也。漢滅朝鮮。通使稱王者三十餘國。倭王最雄長者。居邪馬臺。卽邪摩維。歷漢魏晉宋隋皆朝貢。稍習華音。唐咸亨初。惡倭名。更號日本。國朝洪武二年。倭寇山東並海郡縣。又寇淮安。三年。寇山東。轉掠浙東福建旁海諸郡。是年。遣萊州府同知趙秩。賜璽書。諭其王良懷言。倭寇海上。書至日。如臣我。奉表來庭。不臣則修兵自固。秩至。諭王中國聖主威德。責其入貢。王曰。吾國未嘗不慕中國。顧蒙古戎狄蒞華。以小國視我。乃使趙良弼。誑我好語。初不知其覘我國也。旣而發舟數千。襲我。比至。一時風霆漂覆。幾無遺類。自是不與通者數十年。爾得非良弼後乎。將刃之。秩徐曰。聖天子生華帝。華非蒙古比。我亦非良弼後。爾殺我。禍不旋踵。王氣沮。禮秩具物遣僧。隨秩奉表。稱臣入貢。使未至。又掠温州。五年。上諭劉基曰。東夷尙禪。

教。姑遣明州天寧僧祖闡。南京瓦官僧無逸。開諭之。良懷欲畱。二僧力辭。王遣使。同二僧入貢。是年。寇海鹽。澈浦。温州。初令浙江福建。造海舟防倭。而倭又寇福建海上諸郡。六年。以於顯爲總兵官。出海巡倭。倭寇登萊。七年。寇膠州。是年。遣僧來貢。無表文。卻之。其臣亦遣僧。貢馬茶布刀扇。上曰。此私交也。亦不受。令中書省。移文責王。九年。遣僧歸廷用等。奉表貢馬及方物謝罪。賜王及使。文綺有差。已而上覽表。曰。良懷不誠。詔責之。十二年。來貢。無表文。安置使人於陝西番寺。十三年。遣使詔諭良懷。遣僧如瑤。貢馬。令禮部。移書責王。數掠我海上。復卻之。諸僧皆安置川陝番寺。十四年。遣僧入貢。乞還安置諸僧使。上曰。日本旣謝罪。還其使。召至京。宴賞遣歸。十五年。歸廷用又來貢。於是。有林賢之獄。曰。故丞相胡惟庸。通日本。蓋祖訓所謂。日本雖朝實詐。暗通奸臣。胡惟庸。謀爲不軌。故絕之也。是時。惟庸死且三年矣。十六年。寇金鄉。平陽。十七年。如瑤又來貢。坐通惟庸。發雲南守禦。是年。信國公和致仕。居鳳陽。上召至京。諭曰。日本小夷。屢

擾東海上。卿雖老。強爲朕行。視要地築城。防此賊。信國公築登萊至浙沿海五十九城。民丁四調一。爲戍兵。二十年。置浙東西防倭衛所。是年。遣江夏侯周德興。築福建海上十六城。設衛所。遂築福建。漳泉人爲兵。戍並海衛所。二十六年。寇金鄉。二十七年二月。遣都督僉事劉德商。巡視兩浙防倭。三月。又勅都督楊文尋。又勅魏國公徐輝祖。安陸侯吳傑。練浙江海上兵。防倭。二十八年。寇金州。靖難後。太監鄭和等。率舟師三萬。下西洋。日本遣人來貢。并擒獻犯邊賊二十餘人。卽付使人治之。縛置甌中。悉死。永樂二年。使還。遣通政趙居任。賜王冠服。文綺金銀古器書畫。又給勘合百道。令十年一貢。每貢正副使等。毋過二百人。若貢非期。人船踰數。夾帶刀鎗。並以寇論。居任還。不受王餽。上喜。厚賜之。尋命僉都御史俞士吉。賜王印誥冊封。爲日本國王。詔名其國之鎮山。曰壽安鎮。國山上。爲文勒石。久之。嗣王道義卒。子源道義嗣。益奸狡。時時令各島人掠我海上。九年。寇盤石。十五年。寇松門金鄉平陽。是年。遣禮部員外郎呂淵。諭王。還

所掠海上人。十六年遣使謝罪。當是時。數入金蓋。都督劉榮總兵守遼東。繕海上墩堡。伏兵伺之。十七年倭船入王家山島。傳烽沓至。榮率精兵疾馳入望海塢。賊數千人。分乘二十舟。直抵馬雄島。進圍望海塢。榮發伏出戰。遣奇兵布伏諸山下。斷其歸路。賊奔入櫻桃園。榮合兵圍而攻之。斬首七百四十二。捕生八百五十七。召榮至京。封廣寧伯。自是不敢窺遼東。二十年寇象山。初方國珍據溫台處。張士誠據寧紹。杭嘉蘇松通泰諸郡。皆在海上。方張旣降滅。諸賊強豪者。悉航海。糾島倭入寇。以故洪武中。倭數掠海上。高皇旣遣使命將築城增戍。又命南雄侯趙庸招蠻戶島人漁丁賈豎。蓋自淮浙至閩廣。幾萬人。盡籍爲兵。分十千戶所。於是海上惡少。皆得衣食於縣官。洪武末年。海中方張諸逋賊。壯者老。老者死。以故旁海郡縣。稍得休息。永樂初。西洋之役。雖伸威海表。而華人習知海夷金寶之饒。夷人來貢。亦知我海道。奸闌出入。華夷相糾。以故寇盜復起。非廣寧之捷。禍未已也。宣德元年。遣人來貢。人船刀劍。不奉我約束。上諭使

臣。自後貢母過三舟。使人母過三百。刀劍母過三十。否不受。七年。遣人來貢。如約束。受之。八年。源道義卒。命太監雷春。少卿潘賜等。弔祭。十年。嗣王遣使貢謝。倭自得我勸合。方物戎器。滿載而來。遇官兵。矯云入貢。貢卽不如期。守臣幸無事。輒請俯順夷情。主客者爲畫可條奏。卽復許貢。云不爲例。嗣後再至。亦復如之。我無備。卽肆出殺掠。滿載而歸。宣德末年。海防益備。賊不得閒。貢稍如約。遂許夷至京師。宴賞市易。飽恣其欲。已而備禦漸疎。正統四年。寇大嵩。入桃渚。官庾民舍。焚劫一空。驅掠少壯。發掘冢墓。束嬰孩竿柱上。沃之沸湯。視其啼號。拍手笑樂。捕得孕婦。忖度男女。刳視中否。爲勝負。飲酒荒淫穢惡。至有不可言者。積骸如陵。流血成川。城野蕭條。過者隕涕。於是朝廷下詔備倭。命重帥守要地。增城堡。謹斥堠。修戰艦。合兵分番。屯駐海上。寇盜稍息。七年。來貢。十一年。寇海寧乍浦。成化初。忽至寧波。知我有備。矯稱進貢。守臣爲請於朝。且欲遣之至京。楊文懿公守陳。貽書主客。力言其不可許。二十年。遣周瑋等來貢。弘治八年。

壽莫來貢。正德六年。宋素卿。源永壽來貢。求祀孔子儀注。不許。鄞人朱澄告言。素卿本澄從子。叛附夷人。守臣以聞。主客以素卿正使釋之。令諭王效順。無侵邊。八年。僧桂梧等來貢。嘉靖元年。王源義植無道。國人不服。諸道爭貢。大內藝興遣僧宗設。細川高遣僧瑞佐及素卿。先後至寧波。故事。凡番貢至者。閱貨宴席。並以先後爲序。時瑞佐後至。素卿奸狡。通市舶太監。饋寶賄萬計。太監令先閱瑞佐貨。宴又令坐。宗設上。宗設席間與瑞佐忿爭。相讐殺。太監又以素卿故陰助佐。授之兵器。殺總督備倭都指揮劉錦。大掠寧波旁海鄉鎮。素卿坐叛論死。宗設。瑞佐皆釋還。給事中夏言上言。禍起於市舶。禮部遂請罷市舶。而不知所當罷者。市舶太監。非市舶也。夷中百貨。皆中國不可缺者。夷必欲售。中國必欲得之。以故祖訓雖絕日本。而三市舶司不廢。市舶初設在太倉黃渡。尋近京師。改設於福建浙江廣東。七年罷。未幾復設。蓋東夷有馬市。西夷有茶市。江南海夷有市舶。所以通華夷之情。遷有無之貨。收徵稅之利。減戍守之費。又以

禁海賈。抑奸商。使利權在上。罷市舶。而利孔在下。奸豪外交內訌。海上無寧日矣。番貨至。輒賒奸商。久之。奸商欺負。多者萬金。少不下千金。轉展不肯償。乃投貴官家。久之。貴官家又欺負。不肯償。貪戾甚於奸商。番人泊近島。遣人坐索。久之。竟不肯償。番人乏食。出沒海上爲盜。貴官家欲其亟去。償以危言憾官府。云番人據近島。殺掠人。柰何不出一兵。備倭當如是。及官府出兵。輒齎糧漏師。好語啗番人利。他日貨至。且復賒我。如是者久之。番人大恨諸貴官家。言我貨本倭王物。爾價不我償。我何以復倭王。不掠爾金寶殺爾。倭王必殺我。盤據海洋。不肯去。近年寵賂公行。上下相蒙。官邪政亂。小民迫於貪酷。苦於徭賦。困於飢寒。相率入海從之。兇徒逸囚。罷吏黠僧。及衣冠失職。書生不得志。羣不逞者。皆爲之奸細。爲之鄉道。人情忿恨。不可堪忍。弱者圖飽煖。且夕。強者奮臂欲洩其怒。於是王忤瘋。徐必欺。毛醯瘋之徒。皆我華人。金冠龍袍。稱王海島。攻城略邑。劫庫縱囚。遇文武官發憤斫殺。卽伏地叩頭。乞餘生。不聽。而其妻子宗族。田廬。

金穀公然富厚。莫敢誰何。浙東大壞。二十五年。以朱紈爲浙江巡撫都御史。兼領興福漳泉。治兵捕賊。紈清諒方勁。任怨任勞。嚴戢閩浙諸貴官家。嘗言。去外夷之盜易。去中國之盜難。去中國之盜易。去中國衣冠之盜難。上章鑄暴貴官通番二三渠魁。於是聲勢相倚者大譁。切齒詆誣。惑亂視聽。改紈爲巡視。未幾言官論劾。又遣言官卽訊。甘心煨煉。必欲殺紈。紈憤悶卒。紈所任福建有功海道副使柯喬。都指揮盧鏜。殺賊有功。皆論死。繫按察司獄。於是華夷羣盜唾手肆起。益無忌憚。三十一年。殘黃巖掠定海。浙東騷動。遣都御史王忬巡視兩浙。兼領漳泉興福四郡。以都指揮俞大猷。湯克寬爲浙閩參將。勦賊。顧兵政久弛。將士耗鈍。水寨戰艦所在廢壞。忬經略未幾。羣賊總至柵寨列港。外約諸島。內招亡命。勢益猖獗。三十二年。大猷冒儉出洋。焚蕩巢穴。首賊逸去。羣偷流散。乘風奔突。倏忽千里。溫台寧紹杭嘉蘇松揚淮十郡。並受其害。克寬統領步兵。往來海壖。護城捕賊。斬獲亦多。忬不肯隱敗冒功。擒治奸豪。破解支黨。大猷克寬

兩參將。皆知勇可任。徒以江南人素柔軟。賊未登岸。望風奔潰。文武大吏。未能以軍法繩下。而有司往往以軍法脅持富人。巧索橫斂。指一科百。師行城守。餉糧百物。類多乾沒。十不給一。廉謹之士。又謂南人善謗。低頭束手。不敢動一錢。於是公私坐困。戰守無策。始釋柯喬。起盧鏜。而賊船聯翩滿海。破昌國臨山霽。霽乍浦青村南滙吳淞江諸衛所。圍海鹽太倉嘉定。入上海。掠華亭海寧平湖。餘姚定海諸州縣。焚劫殺戰汗辱。慘於正統時矣。而通番奸豪。又言忬。大猷搗巢非計。且搖動忬。忬薦鏜。起自閩參將。代克寬。克寬以副總兵將屯金山。閩人故忌鏜。劾鏜凶險不可用。南京言官又復薦鏜。三十三年。遂犯江北海門如皋通州。皆被殺掠。是時。復用盧鏜爲參將。而以俞大猷爲浙直總兵。未幾。工部侍郎趙文華。以海賊猖獗。請禱海神。遂遣文華行禱。公私勞費不貲。皆歸囊橐。比忬改大同巡撫。徐州兵備。李天寵代忬。南兵部尙書張經。提督浙閩江南北軍務。有王江涇之捷。文華素忌經。天寵。遂奏經。天寵。逮詔獄。論死西市。而以浙江

巡按胡宗憲代天寵。南戶部侍郎楊宜代經。自後賊益熾。縱橫出入二十六郡。文華還朝。未幾。又出監督諸軍。搜括官庫富豪金寶書畫。數百萬計。交通蒙蔽。以敗爲功。以功爲罪。雖有沈莊梁莊之戰。竟莫救荼毒之慘。兩浙江淮閩廣。所在徵兵集餉。提編均徭。加派稅糧。截畱漕粟。扣除京帑。請給醴課。迫脇富民。釋脫兇惡。濫授官職。浪費無經。其爲軍旅之用。纔十之一。征發漢土官兵。川湖貴廣。山東西。河南北。靡不受害。臨賊驅之不前。賊退遣之不去。散爲盜賊。行者居者。咸受其害。於是外寇未寧。而內憂益甚矣。宗憲計擒賊首王直。浙西江東。稍得安靖。浙東温台。江北淮揚。閩中嶺表。尤被其毒。已而俞大猷被中傷。盧鏜代之。賴朝廷聖明。大猷得不死。江北巡撫李遂。有廟灣之捷。入南兵部爲侍郎。唐順之代遂。福建巡撫王詢。數有功。畏讒引疾去。代者劉燾。宗憲以擒直功。陞右都御史。加太子太保。敍子錦衣千戶。先是文華陞工部尙書。以論吏部尙書李默。卽加太子太保。又以征倭功。加少保。子廕錦衣千戶。不數月。文華削籍千戶。

謫戍榆林。自壬子倭奴入黃巖。迄今十年。閩浙江南北廣東人。皆從倭奴。大抵賊中皆華人。倭奴直十之一二。久之。奸頑者嗜利。貧窘者避徭賦。往往喜賊至。而貪殘之吏。又從而驅之。封疆之臣。輒請添官。當事者不敢阻。於是添設都御史三人。總兵一人。副總兵二人。參將十三人。兵備副使十一人。諸將校近百人。田賦倍於常科。徵徭溢於甲式矣。其俗。男子魁頭斷髮。黥面文身。婦人被髮屈紒。皆跣足。閒用屨。其喜盜。輕生好殺。天性然也。物產金銀琥珀水晶硫黃水銀銅錢白珠青玉蘇木胡椒細絹花布螺鈿漆器扇犀象刀劍鎧甲馬。交市華人。喜得童男女錦綺絲綿磁針。

真臘。本扶南屬國。一名占臘。在東海中。隋始通中國。唐神龍中。并扶南。而國分爲二。其南近海。多陂澤。爲水真臘。北多山阜。爲陸真臘。後復合爲一。宋宣和初。封爲真臘國王。慶元中。破占城。立其國人爲占城王。占城遂爲屬國。又有參半真里登流眉蒲甘等國。皆屬真臘。聚落頗眾。地亦廣。洪武六年。國王忽

兒那遣柰亦告郎表獻方物。賜大統曆文綺。二十年。正黎列保昆耶甘苦者。遣使貢象及方物。景泰二年。貢。賜王及妃文綺。朝貢至今不絕。其俗尙華侈。東向爲上。右手爲潔。縣鎮風習。大類占城。王三日一視朝。婚娶燃燈不息。視力耕種。產銅金諸香象翠羽嘉樹異魚。

暹羅。暹羅本暹與羅斛二國。在南海中。暹土瘠不宜耕稼。羅斛土平衍。種多穫。暹仰給焉。元至正間。暹降羅斛。洪武四年。暹羅斛國王參烈昭毘牙。遣柰思俚儕刺識悉替。奉金葉表朝貢。賜大統曆。十年。遣子昭祿羣膺。奉金葉表貢象及方物。遣使賜詔及暹羅國王之印。十六年。給勘合文冊。令如期朝貢。永樂元年。稱暹羅國。十五年。瑣里人昭祿羣膺哆囉諦刺爲王。遣柰必。上表貢方物。乞量衡式。賜古今列女傳。金綺。量衡。令三年一朝貢。宣德中。稍減賜物。著令。其國方千餘里。羣山環繞。峭拔崎嶇。地下濕土。疎惡。氣候嵐熱不齊。自占城西南。舟行七晝夜。至其國。王宮壯麗。民樓居。其樓密聯檳榔片藤。繫之甚固。籍以藤蓆。

竹簾。寢處于中。王白布纏首。腰束嵌絲幌。加錦綺。跨象或乘肩輿。尙釋教。國人效之。好爲僧尼。婦人多智。夫聽於妻。妻與中國人私。不爲怪。男陽嵌珠玉。富貴者範金盛珠。行有聲。婚則羣僧迎壻。至女家。僧取女紅。貼男額。稱利市。喪禮。貴者灌水銀葬。民間烏葬。言語大類廣東。俗澆浮。習水戰。好鬪。喜寇掠。市用海貳。煮海爲鹽。釀秫爲酒。產寶石奇香異木。翠羽獅白象白鼠。蘇木賤如薪。色絕勝。六足龜。珊瑚。

蘇門答刺。蘇門答刺。卽古蘇文達那。西洋之會要也。東南大山。西北距海。山連阿魯。那孤兒。黎伐三國。自滿刺加西南行。順風五晝夜。至答魯蠻村。舍舟陸行十里。至其國。無城郭。有大溪入海。海口大濤。舶至此。往往沒溺。洪武中。國王遣人奉金葉表。貢馬及方物。永樂三年。國王鎖丹罕難阿必鎮。遣阿里來朝。貢封爲蘇答刺國王。賜印誥金幣。五年。使來貢。已而王與花面王戰敗。中矢死。子弱不能復讐。其妻發憤。令于國曰。能復此讐者。我以爲夫。與共國事。有漁翁聞

之。率眾敗殺花面王。王妻遂從漁翁。永樂七年。王來貢。上喜。厚賜之。十年。遣使至其國。故王假子率部眾殺漁翁王。王子蘇幹利率眾奔于峭山。時時相侵。欲復讐。十一年。太監鄭和擒送京。伏法。漁翁王子感激。貢方物甚夥。宣德中。貢使數至。用金葉表。十年。封其子嗣王。皆有賜。至今朝貢不絕。風俗淳厚。言語和媚。室廬婚喪衣服物產。類滿刺加。田礮穀少熟。番舶往來。財貨充牣。人饒富。市用金錫錢。惟酋長好殺。殺人輒取血浴身。花面王者。卽那孤兒王也。國小。僅比大村。祇千餘家。人皆勞面。以故號花面。風俗語言。類蘇門答刺。

爪哇。爪哇。古闍婆國。又名莆家龍。元稱爪哇。其國分東西二王。所屬有蘇吉丹。打板打綱。底勿諸國。洪武三年。王昔里八達刺。遣入的占必。奉金葉表。貢方物及黑奴三百人。納元所授宣勅。已而我使至三佛齊。爪哇要而殺之。十三年。王八達那巴那務。遣阿烈彞烈時。奉金葉表朝貢。上遣其使還。詔諭責王。遂絕其使。永樂二年。其國東王遣使朝貢。請印與之。五年。西王都馬板。與東王戰。滅

東王時我舟過東王城。西王殺我百七十人。西王懼。遣亞烈加恩。謝罪。勅詰責西王。令償死者黃金六萬兩。已而遣人貢萬兩。禮官請索如數。上曰。朕利金耶。令遠人知畏耳。蠲其金。賜鈔幣諭之。十六年。西王楊惟西沙。遣人獻白鸚鵡。正統八年。令三年一貢。其國四鄉。初至杜板。僅千家。二酋主之。流寓多廣東。漳泉人。又東行半日。至廝村。中國人客此。成聚落。遂名新村。約千餘家。村主廣東人。番舶至此互市。金寶充溢。人富饒。又南水行。可半日。至淡水港。乘小艇行二十餘里。至蘇魯馬益。亦有千餘家。半中國人。港傍大洲。林木蔚茂。有長尾猿數萬。又水行八十里。至漳沽登岸。西南陸行半日。至王所居。滿者伯夷。僅二三百家。總領七八人。王宮磚墉。高餘三丈。方三十餘里。屋高四丈。地覆板。蒙藤花蕭。跣跣而坐。民居茅茨磚庫。坐臥于內。王蓬頭。頂金葉冠。胸繫嵌絲幌。腰束錦綺。佩短刀。跣足。跨象或乘牛。民男蓬頭。女椎結。上衣下悅。男必腰刀。刀極精巧。刑無鞭朴。罪不問輕重。藤繫刃殺之。市用中國古錢。衡量倍于中國。磁甌綺帛。國

人大抵三種。西番賈胡居久者。服食皆雅潔。中國流寓者。尙回回教。持齋受戒。曰唐人。土人有名無姓。尙氣好鬪。顏色黝黑。獐頭赤腳。信鬼。坐臥無椅榻。飲食無匙箸。啖蛇蟻虫蚓。與犬同寢食。不爲穢也。婚。男造女家後五日。迎婦。金鼓刀盾。前後甚都。婦裸被髮。跣足。縈嵌絲帨。戴被金珠綵飾寶粧。喪有水葬火葬犬葬。惟死者所欲。產金珠銀犀角象牙瑇瑁青鹽檳榔椒香蘇木栲榔木吉貝倒掛鳥綵鳩綠鳩紅綠白鸚鵡白鹿白猿猴。

皇明四夷考卷下

古俚。古俚。大國。西洋諸番之會。去中國十萬里。西瀕海。南距柯枝。自柯枝海行。可三日。至永樂元年。王馬那必加刺滿。遣馬戍。朝貢馬。五年。遣太監鄭和。賜王誥幣。陞賞其將領有差。王好浮屠。敬象牛。老不傳子。傳外孫。否則傳弟。無外孫弟。傳善行人。族類分五種。如柯枝。王南毘人。不食牛。將領回回人。不食豬。大家晨起。用牛糞塗地。煨牛糞爲囊。佩之。每日。水調抹額及股。國事皆決于二將領。土宜麥。多馬。俗尙信義。行者讓路。道不拾遺。海濱爲市。通諸番。用金銀錢。以葫蘆爲樂器。紅銅絲爲絃。歌聲相協。鏗鏘可聽。刑無鞭笞。輕斷手足。重罰金。誅戮沒產。夷其族。有西洋布。曰摺黎。本出鄰國坎夷巴。匹闊四尺五寸。色絲閒花。帨闊五尺。產孔雀白鳩馬。無餘鳥諸香。嘗貢金絲寶帶。金絲細如髮。結花綴八寶珍珠鴉鵲石。

淳泥。本閩婆屬國。在西南大海中。統十四州。洪武四年。王馬漠沙。遣亦

思麻逸。進金表銀箋。貢方物。賜金綺。永樂三年。遣使封其國主麻邪惹加那乃。爲淳泥國王。賜印符誥幣。六年。王率其妃及子來朝。遣使迎勞之。福建。至南京。王上金表。獻珍物。妃箋獻中宮。東宮。上宴王奉天門。是年。王卒于會同館。諡恭順。葬石子岡。樹碑立祠。有司春秋祀。封其子遐旺嗣。賜玉帶金銀綺幣器皿。使送歸國。遐旺請封其國後山。賜名長寧鎮國。上爲文刻石。十二年。洪熙元年。皆來朝貢。俗以板爲城。以銅鑄甲。煮海爲鹽。釀秫爲酒。喪葬有棺。盛食無器。室宇弘敞。原田豐利。習尙奢侈。愛敬華人。王服頗效中國。產片腦諸香象牙吉貝瑋瑁鶴頂。

滿刺加。滿刺加。永樂三年。王西利入兒速刺。遣使奉金葉表朝貢。言願內附。爲屬郡。效職貢。七年。太監鄭和充冊封使。賜印誥錦綺。封爲滿刺加國王。九年。嗣王拜里迷蘇刺。率其妃及子五百四十人來朝。上御奉天殿。宴王。賜玉帶羽儀鞍馬金銀錢鈔錦綺。王妃冠服。子姓儉從。賞各有差。十年。遣使送還國。十二

年。王母來朝貢。厚賜之。二十二年。宣德九年。王復來朝貢。賜亦厚。正統十年後。數遣使來朝貢。天順三年。王無答佛哪沙卒。子舟茫速沙請封。遣使冊立爲王。成化末。給事中林榮。行人黃乾亨奉使。溺海死。廕子入監讀書。其國舊名五嶼。東南距海。西北皆山。地瘠鹵。故未稱國。隸暹羅。歲輸金五千兩。既奉我正朔。始不隸暹羅。王白帛纏首。衣青花袍。躡皮屨。乘輜。俗淳朴。尙回回教。民舍如暹羅。婚喪大類爪哇。聯榻趺坐。刳木爲舟。泛海而漁。旁海人畏龜龍。龜龍高四尺。四足。身負鱗甲。露長牙。遇人卽嚙。嚙卽死。山有黑虎。視虎差小。或變人形。白晝羣入市。覺者擒殺之。

榜葛刺。西天有五印度國。榜葛刺者。東印度也。永樂六年。王嚮牙思丁。遣人朝貢。九年。至太倉。命行人往宴勞之。十二年。王塞弗丁。遣人奉金葉表。獻麒麟。國最大。自蘇門答刺海行。過翠藍島。至瀾地港。更小舟行五百里。至鎖納兒港。登陸。行三十五里。至其國。地廣人稠。財物豐衍。甲於諸鄰國。國有城郭。王及諸

官皆回回人。男祝髮。白布纏頭。圓領長衣。束綵帨。躡皮屨。市用銀錢。海賦。五領山最高大。氣候常熱如夏。賦十二。刑笞杖徒流。官有印章行移。軍有糧。陰陽醫卜。百工技藝。大類中國。有衣黑白花衫。縈帨。佩珊瑚琥珀。纓絡繫臂。硝子鐳釧。歌舞侑酒者。曰根肖。速魯柰柰。蓋優人也。能作百戲。以鐵索繫虎。行市中。入人家解索。坐虎于庭。裸而搏虎。虎怒。交撲。仆虎數回乃已。或手投入虎喉。虎亦不傷。戲已。仍繫之。家人爭以肉啖虎。勞戲者錢。曆有十二月。無閏。風俗朴厚。人好耕殖。一年二熟。產鑛鐵。翠羽。珊瑚。蛇馬。桑漆。樹絲綿尤多。鎗翦最巧。利布數種。有闊四五尺者。薰黑。薰勒。闊四尺。背面皆毳絨。厚可五分。卽兜羅錦也。白樹皮布。膩滑光潤。如鹿皮。椰菱爲酒。檳榔當茶。

錫蘭山 錫蘭山在大海中。海中有翠藍山。最高大。自山東南。乘風可三日。至赤卯塢。塢人穴居。男女皆裸。若野獸。不粒食。食芭蕉子。波羅蜜。魚蝦。又西海行可十日。至佛堂山。泊舟處濱海。山麓有臥佛寺。佛榻寶飾極華麗。又西北陸行

五十里。至王居。王尙釋重象牛。煨牛糞灰塗體。飲牛乳。不食其肉。殺牛者罪死。王宮民居。旦必調牛糞塗地。而禮佛。國富饒。地廣人稠。亞於爪哇。民上裸。下纏帨。加壓腰。去鬚毫。留髮。布纏之。女椎髻于後。下縈白布。飲食不令人見。產青紅黃鴉。忽石水晶。海洲有珠池。日映光浮起。閃閃射目。閒歲一淘珠。諸番買爭來市珠。土宜稻。不宜麥。市用金錢。重麝香。綺絹。青磁器。銅錢。樟腦。永樂九年。王亞烈若柰兒。鎖里人。絕我使途。太監鄭和俘至京。十年。封耶巴乃那爲王。赦亞烈若柰兒還國。耶巴乃那。故王族人。也。一名不刺葛麻。巴思刺查。國人以爲賢。故封之。遣使送歸。詔諭其國。正統十年。遣使耶把刺謨的里啞來朝。貢珠寶石。天順三年。王葛力生。夏刺昔利把交刺惹。復遣使朝貢。

蘇祿。蘇祿在東南海中。人鮮粒食。食魚蝦螺蛤。短髮纏卓縵。煮海爲鹽。釀蔗爲酒。織竹布爲業。氣候常熱。永樂十五年。其國東王巴都葛叭答刺。西王巴都葛叭蘇哩。峒王叭都葛巴刺卜。各率其妻子頭目來朝。貢珍珠瑇瑁諸物。賜王

冠服玉金帶蟒龍金銀錢鈔錦幣器皿。王妃王子女姻戚頭目。賜物各有差。三王者。東王爲尊。西峒二王副之。歸次德州卒。命有司營葬。爲文樹碑墓道。畱其妃妾及僮從十人守墓。令畢三年還國。遣使封其長子都麻合。爲蘇祿國東王。十九年。遣使來貢。

柯枝。柯枝一名阿枝。東連大山。西南北皆海。自葛蘭山海西北行。一晝夜可至。永樂二年。王可亦里。遣完者答兒朝貢。請封其國大山。詔封爲鎮國山。賜碑文。是時。太監鄭和。使至其國。國王。瑣里人也。首纏黃白布。上上衣。下縈絲帔。束綵壓腰。綴椰木葉。苦屋。國人五種。曰南昆。與王同類。祝髮。線懸脰。爲貴族。次回人。次富有財者。曰哲地。次牙繪。曰革全。又次卑賤者。曰木瓜。木瓜濱海而居。業漁樵。屋簷不得過三尺。上衣不過膝。途遇南昆哲地。卽伏。候過乃起。王尙浮屠。敬象牛。建寺。範金爲佛。每旦鳴鐘鼓。汲泉灌佛頂數回。已乃禮之。有曰濁肌者。蓋優婆夷也。娶妻。不剃胎髮。髮縷縷垂後。牛糞灰塗體。行吹大螺。妻隨之乞。

錢。氣候常熱多雨。市用金銀錢。銀錢十五當金錢一。產珠象牙蘇木。

溜山。祖法兒。祖法兒。亦名左法兒。東南皆海。西北重山。自古徂西北海行。十晝夜

可至。無城郭。俗尙回回教。體幹修碩。語言朴實。王白布纏頭。衣青花絲帨。或金

錦袍。靴屨乘轎跨馬。前後列象駝馬。鼓吹。氣候常如秋。市用金銅錢。錢文人形。

永樂中。王亞里遣人來朝貢。宣德中。又來朝貢。產西馬。駝鶴頂。駝雞。福鹿片腦。

沉香乳香。乳香卽樹脂。諸奇藥。以易中國紵絲磁器。駝雞如鶴。長三四尺。腳二

指。毛如駝。行亦如之。駝單峯或雙峯。皆可乘。

溜山。溜山。四面濱海如洲。在西海中。有石門。如城闕。土瘠。無城郭。依山聚居。

八村稍大。皆以溜名。可通舟楫。餘小溜。無慮三千。土人曰。此弱水三千也。人巢

居穴處。不識菽粟。啖魚蝦。無衣。草木葉蔽前後。舟行遇風。失入溜卽溺。溜山傍

有牒幹國。皆回回人。俗淳厚。業漁。好種椰樹。氣候常熱如夏。市用銀錢。產龍涎

香海貳。椰皮結繩。可貫板成舟。塗瀝青。堅如鐵釘。鮫魚一名溜魚。織絲帨。甚精。

緞。亦有織金帔。永樂中。國王亦速福。遣使來朝貢。

南泥里。南泥里。隸淳沱。自蘇門答刺。舟行三晝夜可至。東距黎伐。西北距海。

南連大山。山南際海。僅千餘家。皆回回人。俗朴實。王居類樓。高廣。嚴整幽潔。市

用銅錢。少穀食。食魚蝦。西北大海。卽西洋。中有帽山。平頂。土人稱爲那沒黎。番

舶皆以此山爲指南。山下淺水有珊瑚樹。大者高二三尺。分枝婆娑可愛。依山

居人二三十家。皆稱王。問其爲誰。輒曰阿孤楂。華言王也。或曰南泥里。卽南巫

里。

黎伐。黎伐。小國。南連大山。北際海。西距南泥里。東南連那孤兒。居民一二千

家。推一人爲首領。隸蘇門答刺。言語服用。與蘇門答刺同。山多野犀。

哈密。哈密。本古伊吾廬地。在燉煌北大磧外。西北羌胡往來要路也。元封忽

納失里。爲威武王。已而改封肅王。卒。弟安克帖木兒嗣。國初置甘州五衛於張

掖。肅州衛於酒泉。涼州衛于武威。西寧衛于湟中。又置山丹。永昌。鎮番。莊浪四

衛。高臺鎮。東。古浪三千戶所。自陝西蘭州。渡河千五百里。至肅州。肅州西七十里。爲嘉峪關。長陵初。設關外七衛。曰哈密。曰安定。曰阿端。曰赤斤蒙古。曰曲先。曰罕東。曰罕東左。七衛皆在嘉峪關西。哈密又在六衛西。東去肅州。西去土魯番。各千五百里。北至瓦刺數百里。永樂二年。改封安克帖木兒。爲忠順王。以頭目馬哈麻火只等。爲指揮等官。分其眾。居苦峪城。三年。忠順王卒。無子。兄子脫脫。先是。俘蠻夷邸。朝議。哈密爲西域入貢孔道。宜釋脫脫。令嗣王。乃賜金印。誥命玉帶文綺。遣使送還。令察諸番向背。凡諸番貢物表文譯上。四年。賜王及其祖母速哥失里。母妃從母。綺幣有差。是年。速哥失里逐脫脫。勅諸酋。復立脫脫爲王。六年。脫脫暨祖母。各遣使朝貢。九年。脫脫卒。勅都指揮哈納。爲都督僉事。守哈密。是年。封力帖木兒。爲忠義王。賜印誥玉帶。守哈密。卒。從父子孛羅帖木兒嗣。仍封忠順王。賜誥印。十二年。行在驗封員外郎陳誠。使西域還。言哈密城在平川。可三四里。東北二門。王稱速壇。人僅數百戶。顧非一種。多蒙古回回人。

習俗各異。產馬。駝。玉石。鑛。鐵。犬。尾。羊。陰。牙。角。城。北。大。山。西。南。東。皆。平。曠。地。多。鹹。鹵。宜。稔。麥。豌豆。農。耕。亦。用。糞。壤。人。獷。悍。好。利。西。域。三。十。八。國。入。貢。經。哈。密。者。相。攔。出。入。索。道。路。錢。乃。已。洪。熙。元。年。貢。硫。黃。上。詰。邊。臣。哈。密。何。以。有。硫。黃。正。統。四。年。貢。玉。求。紵。絲。與。四。表。裏。天。順。四。年。貢。賜。紙。金。箔。薑。桂。茶。饌。成。化。元。年。令。歲。一。貢。貢。不。過。三。百。人。至。京。不。過。三。十。人。貢。物。馬。駝。玉。石。鐵。器。諸。獸。皮。三。年。以。忠。順。王。外。孫。爲。都。督。賜。銅。印。金。幣。八。年。都。督。赴。京。嗣。官。貢。馬。駝。加。賞。時。酋。者。林。弒。孛。羅。帖。木。兒。無。子。王。母。努。溫。答。力。理。國。事。九。年。土。魯。番。速。壇。阿。力。欲。以。哈。密。掠。赤。斤。諸。夷。王。母。不。從。虜。王。母。金。印。去。遺。番。離。散。王。母。外。孫。都。督。把。他。木。兒。子。罕。慎。避。居。苦。峪。其。奸。狡。者。陰。附。阿。力。伺。我。塞。下。遣。高。陽。伯。李。文。通。政。劉。文。討。阿。力。調。罕。東。赤。斤。番。兵。數。千。駐。苦。峪。不。敢。進。阿。力。遂。輕。中。國。文。等。謬。言。不。見。土。魯。番。遂。還。王。母。金。印。竟。爲。阿。力。所。畱。益。侵。我。城。郭。諸。夷。十。四。年。阿。力。死。子。阿。黑。麻。稱。速。壇。未。壯。二。十。年。守。臣。乘。閒。請。封。罕。慎。嗣。忠。順。王。入。哈。密。罕。慎。貪。殘。國。人。怨。恨。西。

域諸夷貢使往來者。苦罕慎要素。亦怨恨。二十三年。罕慎言。瓦剌有克捨太師。革捨太師。克捨死。其弟阿沙赤爲太師。革捨弟阿力阿古多兀王。與阿沙赤讐殺。西走據哈密。瓦剌尋退去。弘治元年。阿黑麻強曰。罕慎非脫脫族。安得王哈密。哈密。我當王。欲殺罕慎。畏我不敢發。好語罕慎曰。吾爲若聯姻。若爲王益安。無外侮。罕慎喜。許阿黑麻。阿黑麻至哈密。誘罕慎。頂經結盟。遂殺罕慎。亦未敢顯言。據哈密。卽遣使入貢。言罕慎病死。國亂。乞遣大通事和番。立我爲王。居哈密。領西域職貢。兵部尙書馬文升言。外夷北虜最强。屢入貢。乞通使。我不聽。阿黑麻。小夷。且與哈密。各有分地。不可輒通使。亦不得王哈密。彼入若貢。我亦不拒。請勅阿黑麻。諭令還王母及金印。還我哈密。時王母已死四年。遣哈密頭目寫亦虎仙。齎勅諭阿黑麻。以金印城池來歸。遣使朝貢。厚賞之。陞寫亦虎仙爲都督僉事。文升言。哈密有回回。畏兀兒。哈刺灰三種。共居一城。種類不貴。不相下。北山又有小列禿。野乜克力數種。強虜。時擾哈密。必得元遺孽。嗣封。理國事。

庶可懾服諸番。興復哈密。不然。未得休息。乃立安定王族孫陝巴。爲忠順王。安定王者。本脫脫種落。令頭目奄克孛刺阿木郎。輔陝巴。至哈密。六年。諸番索陝巴犒賜。不得。阿黑麻又恨阿木郎。剋賜物。掠其牛馬。遂入哈密。殺阿木郎。虜陝巴及金印去。內閣丘濬謂文升曰。哈密事重。須公一行。文升曰。方隅有事。臣子豈可辭勞。但西域賈胡貫窺利。不善騎射。古未有西域能爲中國大患者。徐當靜之。濬曰。有讖言。不可不慮。文升請行。諸大臣不可。請勅兵部侍郎張海。都督繖謙。行視經略。時阿黑麻貢使寫亦滿速兒等在京師。令海至河西。遣夷使二人。與邊通事致勅。諭阿黑麻。歸陝巴金印。諸夷使爭欲去。海不可。乃遣哈密夷人。以勅往。阿黑麻竟畱不報。海不得已。修嘉峪關。捕哈密奸回。通阿黑麻者二十餘人。戍廣西。請絕西域貢。七年春。海謙不俟命。輒還。逮下獄。降海山西參政。謙奪俸閑住。文升言。土魯番恃其強悍。哈密奸回又反復。欺負中國。不懲創。彼益輕中國。請安置寫亦滿速兒等於閩廣。閉嘉峪關。絕西域貢。令諸夷歸怨。

阿黑麻當是時。西域諸夷皆言。成化間。我入貢。皇帝先遣中貴人。迓我河南。至京。宴賜甚夥。今不撫我。我泛海萬里。貢獅子。謂我開海道。卻不受。卽從河西貢者。宴賞亦薄。天朝棄絕。我相率從阿黑麻。且拒命。中國能柰我何。哈密奸回。又附阿黑麻。阿黑麻遂復入哈密。自稱可汗。大掠罕東諸夷。謀言糾夷數萬。用雲梯攻肅州。且蹂甘州。報至。文升曰。彼虛聲挾我也。土魯番至哈密十數程。中經黑風川。哈密至苦峪。又數程。皆無水草。貢使往返。皆馱水行使。我謹烽火。明斥候。整兵以俟。彼至肅州。我以逸待勞。縱兵出奇。一擊必使彼匹馬不返。已而阿黑麻西去。令頭目牙蘭。以二百餘人據哈密。文升曰。非用陳湯故事。此虜終不畏。文升召肅州撫夷指揮楊翥至京。撫其背曰。汝諳夷情。知西域道路。朝廷今欲擒斬牙蘭。汝計安出。翥曰。此賊黠。非襲之不可。罕東哈密有捷徑。可進兵。兵可不十日至。文升曰。余欲選罕東番兵三千。爲前鋒。我兵三千殿後。各持數日熟食。兼程襲之。何如。翥曰。善。八年。令河西巡撫許進。調兵食。遣副總兵彭清。統

精兵三千。由南山馳至罕東。卽調罕東諸番兵。乘夜倍道襲牙蘭。是冬。進及總兵劉寧清。率兵至肅州。久駐關外。候罕東兵不至。乃出大路。乏水草。行不能疾。牙蘭訶知遁去。我兵入哈密。斬首六十。得陝巴妻女。獲牛羊三千。哈密脅從者八百餘人。皆不殺。攜歸住四礮上。師還糧乏。士馬亦多物故。然西域自是知畏中國。文升言。兵雖抵哈密。然未獲牙蘭。首功亦少。進寧及太監陸闇。不遵節制。徒取空城。無益邊事。獨軍士遠征勞苦。宜陞賞。上念邊臣出塞有功。閏歲祿二十石。寧陞左都督。加俸百石。進左副都御史。清都督僉事。九年。阿黑麻又襲破哈密。令撒他兒及奄克孛刺。往刺木城。奄克孛刺密結瓦剌小列禿。襲斬撒他兒。奄克孛刺還守哈密。阿黑麻遣人圍哈密。哈密人舉火。小列禿見之來援。退走。守臣奏。乞令羈畱貢使。往諭阿黑麻納款。文升曰。阿黑麻未見遣使上款書。不許。是秋。進改陝西巡撫。十年秋。阿黑麻令人送陝巴。還哈密。其兄馬黑上書言。西域諸國。不得貢。怨阿黑麻。今悔過。乞許與黑婁諸國入貢。及還寫亦滿速。

兒等。文升言。此虜挾詐。俟陝巴金印至甘州。取寫亦滿速兒等於閩廣。是冬。起王越爲太子太保左都御史。總制甘涼等處邊務。經略土魯番哈密。十一年。越出河西。取陝巴。至甘州。令哈密三種都督。回回寫亦虎仙。畏兀兒奄克孛刺。哈刺灰拜迭力迷失。佐陝巴。奄克孛刺。罕慎弟也。恨土魯番。亦與陝巴不協。越以罕慎女也。先主刺。妻陝巴。結好奄克孛刺。未幾。越卒。是秋。賜陝巴大帽蟒衣玉帶象笏。復封爲忠順王。放寫亦滿速兒等西歸。時哈密三種人。久苦土魯番。不願還。文升請許半畱肅州。往來自便。十二年春。陝巴至肅州。畏番虜。不肯出關。守臣遣參將。率兵護行。又賞赤斤蒙古諸番。令逐程防護至哈密。是夏。寫亦虎仙致賞。賜於土魯番。遂與土魯番諸夷使。入京朝貢。十三年。阿黑麻及黑婁諸國。皆令人朝貢。十七年春。陝巴嗜酒。培克國人頭目者力克哈等。迎阿黑麻次子真帖木兒。守哈密。陝巴棄城走沙州。真帖木兒。罕慎外孫也。年十三。不肯來哈密。哈密人曰。陝巴走。哈密城空。恐爲野七克力達子所據。真帖木兒始至刺

木城。其兄滿速兒乞守臣。令人來守哈密。真帖木兒自刺木城入哈密。守臣令官舍董傑及奄克孛刺往哈密。撫夷眾。諭迎陝巴還。頭目阿孛刺不聽。必欲立真帖木兒爲王。奄克孛刺與傑等擒殺阿孛刺等六人。餘黨畏服。守臣令都指揮朱瑄率兵送陝巴入哈密。撫送真帖木兒還土魯番。時阿黑麻死。諸兄讐殺真帖木兒。懼不肯還。曰奄克孛刺我外祖。願依之。瑄慮陝巴疑貳。攜真帖木兒居甘州。正德元年陝巴死。其子拜牙卽嗣封幼弱。守臣恐真帖木兒還來侵哈密。畱不遣。三年滿速兒稱速壇。遣人朝貢。乞還真帖木兒。兵部尙書劉宇曰。是謂質其所親愛。不許。四年滿速兒與拜牙卽乞還真帖木兒。下守臣議。五年真帖木兒走出城。追而獲之。六年守臣請歸真帖木兒。下兵部會議。請勅宴賜真帖木兒及滿速兒。拜牙卽并其親目。七年冬令哈密三都督奄克孛刺寫亦虎仙。滿刺哈三。送真帖木兒西還。八年春至哈密。奄克孛刺不肯去。寫亦虎仙。滿刺哈三。送至土魯番。八月拜牙卽淫暴。欲與奄克孛刺叛中國。往土魯番。奄克

孛刺不從。自哈密奔肅州。拜牙卽棄城。走入土魯番。滿速兒令頭目火者他只丁。與寫亦虎仙。滿刺哈三。入哈密。取金印。火者他只丁。又令哈密都指揮火者馬黑木等。至甘州。索賞。哈密諸酋譯書言。拜牙卽棄國從番。乞卽差人守哈密。巡撫趙鑑謬謂。滿速兒忠義。令火者他只丁。寫亦虎仙。滿刺哈三。守城勤勞。差撫夷官。送土魯番諸酋金幣二百。明年正月。撫夷官纔至哈密。滿速兒率眾亦至。分據刺木等城。眞帖木兒又言。河西大饑窘。人死亡且半。甘州城南黑河可引灌城。於是滿速兒及火者他只丁。牙木蘭。虎力奶翁。寫亦虎仙。滿刺哈三。日夜聚謀侵甘肅。番文索金幣萬萬。還我哈密。否卽插旗甘州門。牙木蘭者。本我曲先人。與寫亦虎仙等。專伺我虛實。外挾強番。內要厚賞。自京師至甘肅。徧置奸細。巧爲交結。肆行反閒。然亦專與哈密爲讐。未敢窺嘉峪關也。時總制都御史鄧璋。請專勅大臣一人。經略哈密。大將督兵戰守。特勅四川討賊都御史彭澤。總督甘肅軍務。統延寧固原諸鎮兵。防遏土魯番夷。勿使內侵。逐勦西海卜

亦刺。勅寫亦虎仙等共守哈密。勅責滿速兒。送回拜牙卽。十年春。澤至甘州。火者他只丁。牙木蘭。侵赤金斤王子莊。澤以段布銀器并勅。令通事與三都督。送土魯番。奄克孛刺。時在甘州。言我與番世讐。不肯去。土魯番得賞物。以金印與寫亦虎仙。以哈密付滿刺哈三。澤召還掌院事。巡按馮時雍又言。土魯番未聞請罪。尙數侵邊。下兵部尙書王瓊議。乞畱澤河西。不允。是冬。寫亦虎仙等入京朝賀。當是時。土魯番四出侵掠關外諸衛及苦峪諸城。殘破河西藩籬。又結瓦刺。窺我河西。十一年。李昆代鑑巡撫。請勅滿速兒。送還拜牙卽。滿速兒不聽。令火者他只丁。牙木蘭。復據哈密。滿速兒至沙州。脇土巴部落。入嘉峪關。令肅州奸回。斬巴思高彥名等。內應。攻我肅州。遊擊芮寧。參將蔣存禮禦之。敗績。兵備副使陳九疇發憤。捶死諸奸回。及通賊都督失拜烟答。憑城拒戰。退賊。又急調屬夷兵。劫其老營。遣人結瓦刺。擣巢穴。破其三城。土魯番大創。又盡發寫亦虎仙數十年傾陷哈密奸罪。坐謀叛論死。時失拜烟答子米兒馬黑木入貢。在京

巧賄權倖。突入長安左門。稱冤。下錦衣衛。會兵部三法司奏行河西訊報。十三年。逮昆。九疇至。瓊請廷鞫。幾殺澤。九疇。昆降浙江副使。澤。九疇削籍。是秋。土魯番貢使至京。兵部請繫獄。輔臣梁儲不可。乃已。十四年。刑部會訊。脫寫亦虎仙死。會上幸會同館。寫亦虎仙。米兒馬黑木。因權倖得見。上賜國姓。隨上南征。嘉靖改元。詔逮寫亦虎仙。復論斬死獄中。瓊謫戍。澤起爲兵部尙書。嘉靖元年。昆爲兵部侍郎。九疇僉都御史。巡撫甘肅。明年。失拜烟答子米兒馬黑木。寫亦虎仙子米兒馬黑麻。皆論死。三年。滿速兒大舉入寇。至甘州。九疇忠勇。先登力戰。既解甘州圍。又夜率眾間道兼行。抵肅州。內外夾擊。敗番兵。殺火者他。只丁。虜退去。關中守臣奏河西危急。遣兵部尙書金獻民。都督杭雄。率師西討。獻民至蘭州。諸番已爲九疇所敗。出嘉峪關。獻民用九疇議。請遷發夷使。閉關絕貢。四年。牙木蘭復據哈密。侵肅州。牙木蘭又入沙州。五年。起故輔臣楊一清。提督軍務。一清言。我旣不能制其命。又無以服其心。徒絕彼之貢使。不能阻彼之犯邊。

乞還九疇。議遷烟瘴夷使。解讐息兵。未幾。一清召入內閣。尙書王憲代一清。盡出平涼。羈畱夷使。往諭土魯番。令悔過服罪。歸我哈密。六年。諸議禮臣桂萼。方獻夫。霍韜。張璠。先後上言。哈密不靖。本由彭澤。澤得召用。楊廷和曲庇澤也。乞急用王瓊。以寧西鄙。七年。滿速兒令牙木蘭。據沙州。索羈畱貢使。否且率帖木哥土巴。攻肅州。牙木蘭不肯。欲殺牙木蘭。牙木蘭懼。棄菽麥數萬。率老稚萬人。帳房二千。奔肅州。乞白城山金塔寺住牧。守臣議畱肅州。是春。起瓊兵部尙書。兼右都御史。代憲。瓊至河西。反澤所行事。是秋。天方撒馬兒罕。哈密頭目。各朝貢。滿速兒亦乞通貢。瓊爲奏上。乞還羈使。朝貢夷。未報。土魯番酋虎力納咱兒。糾瓦剌。侵肅州。遊擊將軍彭濬。兵備副使趙載禦之。退去。時張桂必欲論九疇死。并罪廷和。刑部尙書胡世寧力爭。九疇忠勇。再保全河西。得不殺。謫戍邊。澤獻民閑住。八年。土魯番貢獅子夷人至。乞歸哈密通貢。瓊又奏言。土魯番歸我哈密。乞令失拜烟答子米兒馬黑木。守哈密。貢使二十四人遣入京。放歸羈畱。

各番貢使。男婦凡千人。安插沙州。土巴帖木哥部夷五千四百人于白城山。哈密都督訖吉孛刺部夷。在肅州東關。赤斤都督掌卜達兒子鎖南東。在肅州北山金塔寺。罕東都指揮枝丹在甘州南山。下兵部議。當是時。世寧爲兵部尙書。欲專守河西。謝哈密。無煩憊中國。韜上議。必欲復哈密。下兵部議。世寧言。昔太祖建北平行都司。去境四百里。而文皇畀之兀良哈。文皇郡縣交趾。而宣宗棄之。安南哈密非大寧交趾比。況其初封忠順王。爲我外藩者。乃元遺孽。永樂二年封。三年卽故。立其兄子。未幾卽絕。而強立非其子孫者嗣之。蓋嘗三立。三爲土魯番所虜。乃叛。我卽戍。反勞中國。臣竊以爲此與國初所封元孽爲和寧王。順寧王。安定王者等耳。安定王又在哈密之內。近我甘肅。今亦不知其存亡。何獨以一忠順王故。耗我金幣。疲我士馬。窘我財力。議禮諸臣不聽。竟從瓊言。牙木蘭。以世寧言。本歸正人。非叛虜者。唐悉怛謀事可鑒。遂畱不遣。是時瓊言。滿速兒歸我哈密。奉約束朝貢。然哈密竟爲土魯番所據。安插諸衛夷落。皆爲土

魯番所逐。失其故土。住牧河西塞上。北虜盤窟西海。瓦刺結巢北山。河西三面。皆有寇盜矣。明年。滿速兒遣虎力奶翁及天方諸夷使。貢方物。又索牙木蘭。謀言。諸番要約。俟虎力奶翁歸。復侵肅州。會虎力奶翁歸道病死。瓦刺又攻土魯番。我亦有備。稍得休息。而來降人哈六刺言。番酋欲以哈密城與都督米兒馬黑木母管理。兵部因請許其通貢。著令三年或五年爲期。夷使雖多十二入京。餘畱塞上。是後。哈密竟爲土魯番所據。河西守臣防禦羌胡。不暇及西鄙事。要之。哈密守與否。固不足爲中國利害也。秦中老人曰。土魯番哈密。屢勤經略。我義未直。兵則何畏。彼求方棘。予則何恩。況染指貢獻。不足以示信。侵漁宴賜。不足以示廉。而一時士習。又皆重聲譽而略綜核。騰口說而賤實事。不知中國之於夷狄。固不可過撫以納侮。亦不可深拒以窮兵。惟順則撫。故賞斯恩。惟逆則拒。故威斯畏。況西域買胡。倚玉石以射利。藉黃麝以厚生。苟馭之有備。又何患焉。

赤斤蒙古。赤斤蒙古。周西戎。戰國月氏。秦漢屬匈奴。武帝取爲酒泉。燉煌二郡。唐末沒於吐番。宋入西夏。永樂二年。故韃靼丞相苦朮之子塔力尼。率五百人來歸。設赤斤蒙古千戶所。以塔力尼爲千戶。賜誥印。尋陞爲衛。塔力尼爲指揮僉事。十一年。遣頭目鎖南吉利刺。獻叛虜老的罕。陞指揮使。厚賜之。塔力尼卒。子且旺失加嗣。宣德後。朝貢不絕。內白山最大。多草木禽獸。產金駝馬肉菘蓉。自土魯番陷哈密。種人遂散亂。

安定阿端。安定。韃靼別部也。地廣袤千里。無城郭。其俗。馬乳釀酒。氈帳爲廬。產馬駝玉石。洪武七年。撒里畏兀兒安定王卜煙帖木兒。或曰亦板丹。遣使貢鎧甲刀劍。賜金綺。令分其酋長爲阿端。阿真。苦先。帖里四部。賜卜煙帖木兒銀印。仍稱安定王。八年。設安定。阿端二衛。分統四部。卜煙帖木兒卒。遣使諭祭。賜嗣王勅誥金綺。王遣使貢謝。宣德初。與曲先叛。討平之。天順三年。安定王遣使來貢。自後朝貢不絕。成化中。爲土魯番殘破。遂服屬土魯番。安定王苗裔無考。

曲先。曲先。古西戎部落。永樂四年。設曲先衛。以土酋散西思爲指揮同知。宣德元年。叛。討平之。論功。加國師禪師秩。已而遣人入貢。正統二年。頭目黑麻。亂。遣指揮火丁。貢方物。嘉靖中。衛人牙木蘭。爲土魯番所劫。牙木蘭驍勇。土魯番時時令率眾侵哈密。擾我甘肅。已而與土魯番疑貳。擁帳來歸。土魯番請還我哈密。易牙木蘭。欲殺牙木蘭。警動我屬夷。兵部尙書胡世寧以爲不可。遂止。當是時。大抵嘉峪關西諸衛。皆爲土魯番侵擾。不復能爲我藩蔽矣。

罕東。罕東。本西戎部落。洪武二十五年。侵塞。涼國公討之。土酋哈咎遁去。三十年。入貢。立罕東。罕東左二衛。官其酋長鎖南吉刺思爲指揮僉事。永樂二年。鎖南吉刺思。與其兄答力襲等十六人。貢馬。陞鎖南吉刺思爲指揮使。以塔力襲爲指揮同知。頭目奴奴指揮僉事。賜冠帶鈔幣有差。自是歲貢不絕。二罕東皆在沙州城。沙州古燉煌地。嘉峪關外諸衛。二罕東最弱。成化後。土魯番迭入哈密。二罕東不能支。流散各城。正德中。陳九疇擊退土魯番。沙州人稍得生聚。

復歸耕牧。比牙木蘭再入。沙州益殘破。其酋土巴等叛。附土魯番。嘉靖中。王瓊撫住白城山。肅州月餉粟歲且萬石。坐困邊儲。

撒馬兒罕。

撒馬兒罕。漢罽賓也。在哈烈東北三千里。東去嘉峪關九千九百

里。東西相距千里。地平。山川。鐵門峽。阿木河最大。風景偉麗。土田膏腴。宜五穀。頗類中原。獨勝諸國。城依平原。濠深險。北有子城。王居高廣。在城北隅。王白帽。城中遠巷縱橫。肆市稠密。西南番賈多聚於此。市易用銀錢。禁酒。俗尙回回教。有拜天屋。青石雕鏤。極精巧。以羊皮果經文。文字泥金書。人物秀美。多藝能。尤善作室。國東有養夷。沙鹿海牙。賽藍。達失干。西有渴石。迭里迷諸城。皆隸焉。洪武二十年。國主帖木兒。遣回回滿刺哈非思。貢駝馬。詔厚賜之。二十二年。貢馬。二十四年。貢海青。賜勅資予之。二十七年。帖木兒遣使迭力必失。表貢馬二百匹。表曰。恭惟大明大皇帝。受天明命。統一四海。仁德弘布。恩養庶類。萬國欣仰。咸知上天欲平治天下。特命皇帝出膺運數。爲億兆之主。光明廣大。昭然天鏡。

無有遠近。咸昭臨之。臣帖木兒。僻在萬里之外。恭聞聖德寬大。超越萬古。自古所無之福。皇帝皆有之。所未服之國。皆服之。遠方絕域昏暗之地。皆清明之。老者無不安樂。少者無不長遂。善者無不蒙恩。惡者無不知懼。今又施恩遠國。凡商賈之入中國者。使觀覽都邑城池。富貴雄壯。如出昏暗之中。忽覩白日。何幸如之。又承赦書。恩撫勞問。使站相通。道路無壅。遠國之人。咸得其濟。欽仰聖心。如照世之杯。使臣心中。豁然光明。臣國中部落。聞茲德音。惟知歡舞感戴。臣無以報恩德。惟仰天祝頌。聖壽福祿。如天地遠大。永永無極。照世杯者。其國舊傳有杯。光明洞徹。照之可知世事故。云二十八年。遣兵科給事中傅安。郭驥等。使西域。畱撒馬兒罕。永樂五年。頭目哈里。令虎歹達。送安等還。且貢方物。厚賜之。改安等禮科。賜衣。安等言。帖木兒本元駙馬。卒。孫哈里嗣。上遣人祭帖木兒。賜哈里璽書銀幣。已而兀魯伯貢馬。復遣安報使。或曰。兀魯伯卽哈里。洪熙元年。安始還國。請勅命。吏部言。安歷年雖久。未經考覈。例不得授。景陵曰。安使遠夷。

畱二十餘年。良苦。何例爲。與勅。正統十二年。又貢馬玉石。四年。又貢。成化十九年。阿黑麻貢二獅子。夷使請大臣出迎。禮部尙書周洪謨。以爲不可。遣中官迎之。獅子食生羊二。醋酣蜜酪各二瓶。官養獅子。光祿日給酒飯。二十三年。廣東布政司陳選言。撒馬兒罕使臣怕六灣。貢獅子。欲於廣南浮海。從滿刺加更市。獅子入貢。不可貴異物。開海道。利賈胡。貽笑安南諸夷。弘治三年。由南海貢獅子。禮官倪岳言。南海非西域貢道。請卻之。自後。貢皆從嘉峪關入。嘉靖中。其國稱王者五十三人。皆遣人朝貢。產金銀玉銅鐵珊瑚琥珀琉璃屬茲思檀水晶鹽花藥布名馬獨峯駝大尾羊狻猊。

天方。天方。古筠冲地。舊名天堂。又名西域。宣德中。其王遣沙璘來朝貢。俗用回回曆。風景融和。四時皆如春。田沃稻饒。居民樂業。男女辮髮。馬乳拌飯。產馬金琥珀玉石珊瑚犀角。貢從嘉峪關入。

迭里迷。迭里迷。在撒馬兒罕西南。去哈烈二千餘里。新舊二城相去十餘里。

王居新城。東距阿木河。河廣。非舟不可渡。城內外居民僅數百家。孳畜蕃息。多魚。河東地隸撒馬兒罕。河西有蘆林。多獅子。

渴石。渴石。在撒馬罕西南二百六十里。城據大村。周十餘里。四面水田。東南近山。中有園林。故酋帖木兒駙馬居也。規模極宏壯。堂四隅白石柱如玉。牆壁牕牖。盡飾金碧。綴琉璃。西行十數里。皆委曲。山多奇樹。又西去三百里。大山屹立。中有石峽。兩壁懸崖。宛如劈斧。行二三里。出峽口有門。夷人曰。此鐵門關也。養夷。養夷。在賽藍撒馬兒罕。亦力把力。蒙古諸落部間。數相侵擾。以故人無寧居。惟戍卒數百人。處孤城中。城四面皆亂山。東北有大溪。西流。長數百里。溪旁頽垣破廬。蕭然草莽。

達失干。達失干。在賽藍西。去撒馬兒罕七百里。城據平原。甚狹小。四面平岡。多林木。溪流蜿蜒。土宜五穀。人稠密。質朴。饒衣食。卜花兒。卜花兒。在撒馬兒罕西七百里。城居平川。周十餘里。民物富庶。市里

繁華。戶口萬計。地平衍。宜五穀桑麻。天氣溫和。冬不附火。蔬菜不絕。產絲綿布帛六畜。大類中國。

土魯番。土魯番一名土爾番。在火州西百里。古交河縣安樂城也。城方二二里。地平。四面皆山。氣候多煖。少雨雪。土宜麻麥。有瓜果羊馬之利。人皆屋居。信佛法。多僧寺。城西二十里。有崖兒城。城僅二里。居民百餘家。相傳故交河縣治。又云。古車師國。永樂十二年。行在驗封員外郎陳誠。使至其國。誠言。城西北百里有靈山。最大。夷人言。此十萬羅漢涅槃處也。近山有高臺。臺旁有僧寺。寺下皆石泉林木。從此入山。行二十里。至一峽。峽南有小土屋。屋南登山坡。坡有石屋。屋中小佛像五。前有池。池東有山。山石青黑。遠望紛如毛髮。夷人言。此十萬羅漢洗頭削髮處也。循峽東南行六七里。登高崖。崖下小山纍纍。峯巒秀麗。羅列成行。峯下白石成堆。似玉。輕脆不可握。堆中有若人骨狀者。甚堅如石。文縷明析。顏色光潤。夷人言。此十萬羅漢靈骨也。又東下石崖。崖上石笋如人手足。

稍南至山坡。坡石瑩潔如玉。夷人言。此辟支佛涅槃處也。周行羣山。約二十餘里。悉五色砂石。光焰灼人。四面峻壑窮崖。天巧奇絕。草木不生。鳥獸鮮少。甘肅大抵無北虜患。專鎮防西夷。夷種中。土魯番最好狡。宣德五年。始遣使來貢。正統以後。亦嘗來貢。成化弘治閒。番酋阿力。阿黑麻父子。擾我西鄙。虜我哈密。忠順王罕慎。陝巴。拜牙。卽是時。專伺哈密。至正德。遂數犯我甘肅。語在哈密傳中。嘉靖十一年。西域貢稱王者七十五人。貢使至二百九十人。禮官夏言。請國稱一人王。內閣張孚敬言。西域稱王者多。恐彼自封授。或部落相稱。先年入貢。稱王亦有三四十人者。答勅並稱王。今盡裁奪。恐夷情缺望。下禮兵部議。言言。西域諸國稱王者。惟土魯番。天方。撒馬兒罕三國。如日落諸國名甚多。朝貢絕少。且與土魯番諸國不相統。弘治正德閒。土魯番十三入貢。天方。正德閒。四入貢。稱王者。率一人或二人三人。餘稱頭目親屬。嘉靖二年。八年。稱王者。天方至六七人。土魯番至十一二人。此兩年閒。撒馬兒罕至二十七人。內閣言。先年亦

有稱王至三四十人者。併數三國耳。乃今土魯番十五王。天方二十七王。撒馬兒罕五十三王。併數則百五六十王。前此所未有。況所稱王號。原非舊文。卽有同者。地面又異。弘治時。回勅書國稱一王。若循撒馬兒罕往年故事。類答王號。人與一勅。恐非所以尊中國而嚴外夷也。自後各執賜勅。率其部落。貢不如期。使不如數。任意往來。勢難阻絕。驛傳勞煩。宴賜頻數。竭我財力。以役遠夷。計亦左矣。上從言。當是時。土魯番強。殘破我嘉峪關外七衛。及城郭諸國。地大入衆。非復陳驗封奉使時矣。

黑婁 黑婁。在嘉峪關西近。土魯番世結好黑婁。黑婁夷入貢。從土魯番入其地。山水草木禽獸皆黑。男女亦然。宣德七年。始遣使朝貢。

鹽澤 鹽澤。在崖兒城西南。去土爾番三千餘里。在平川中。廣不二里。居民百家。黑的兒火者稱王。居鹽澤。既死。土酋強者統之。產石鹽。堅白如石。可琢爲器。以盛肉食。不鹽而鹹。

哈烈一名黑魯。撒馬兒罕西南。去嘉峪關萬三千里。元駙馬帖木兒之子沙哈魯居其地。國人稱爲速魯檀。猶華言君王也。東有俺都淮。八刺黑諸城。皆隸焉。洪武二十五年。遣使詔諭酋長。賜金綺。永樂七年。頭目麼賚等朝貢。十二年。遣行在吏部員外郎陳誠使其國。正統二年。指揮哈只等貢馬。王石城。方十里。居平川。川廣百里。四面大山。王並東北山壘石爲屋。屋若高臺。無棟梁。牆壁牕牖。皆金碧琉璃。門扉雕刻。嵌骨角。屋傍設綵繡帳房。爲燕寢所。金牀重茵。衣冠大類。亦力把力。民土房或氈帳。以雨少故。上下相與直呼名。雖王亦然。相見稍屈躬。道撒力馬力一語。握手或相抱爲禮。致意於人。則云撒盤少。炊爨飯食就肆。無七箸。交易用銀錢。錢三等。無正朔。時日月亦無斗斛。用權衡爲量。稅十二國用資焉。男髡首。衣尙白。乃喪易青黑。無棺槨。不祀鬼神。祭先於墓所。人多善走。日行可三百里。氣候常煖。市中流水。四時不斷。多水磨風磨。麤器尤精巧。產巴旦杏。鎖伏花毯。金銀銅珊瑚琥珀水晶珠翠名馬獅子黑白文獸。白鹽。

堅明如水晶。琢磨爲器。以水潤之。和肉食。多桑。宜蠶。爲紈綺。細密過中國。農不甚勞。然多穫。田美而每歲更休。地力得完也。餽贈賜予宴會。極豐厚。男女瀆亂無恥。大抵西域城郭諸國。哈烈最鄙陋。然有學舍。聚生徒。講習諸經義。省刑罰。薄賦斂。寡爭訟。好施予。務農桑。諸國又不及也。在王城中極弘偉。

默德那。默德那。卽回回祖國。初國王謨罕。蓋德。生而聖靈。臣服西域諸國。諸國尊爲別諳。援爾。華言天使也。國中有佛經三十藏。凡三千六百餘卷。書兼篆草楷。西洋諸國皆用之。隋開皇中。國人撒哈八撒阿的。翰葛思。始傳其教。入中國。其地接天方。有城池宮室田園市肆。大類江淮閒。寒暑應候。民物繁庶。種五穀。亦有陰陽星曆醫藥音樂諸技藝人。俗重殺。非同類殺不食。不食豕肉。織文雕鏤器皿。最精巧。宣德中。國王遣人。隨天方朝貢。俺都淮。俺都淮。隸哈烈。西南去哈烈千三百里。東北去撒馬兒罕亦如之。城在大村中。村廣百里。城居十一。平曠無險峻。地沃人繁。庶稱樂土。

八刺黑。八刺黑。一名八黑。在俺都淮東北。城居平川。周十餘里。南近山。無險。地。平。廣。食。物。豐。饒。西。南。諸。番。賈。聚。焉。永。樂。中。哈。烈。沙。哈。魯。各。遣。其。子。守。之。于。闐。于。闐。大。國。在。葱。嶺。北。二。百。里。東。西。五。千。里。南。北。千。里。漢。唐。皆。入。貢。中。國。石。晉。時。王。李。聖。天。自。稱。唐。宗。遣。人。入。貢。封。爲。大。寶。于。闐。國。王。宋。未。南。遷。朝。貢。不。絕。永。樂。六。年。頭。目。打。魯。哇。亦。不。刺。金。遣。滿。刺。哈。撒。木。丁。等。貢。玉。璞。十。二。年。吏。部。員。外。郎。陳。誠。至。其。國。國。主。微。弱。鄰。國。交。侵。人。民。僅。萬。計。皆。避。居。山。谷。閒。境。內。惟。火。州。魯。陳。哈。失。哈。力。阿。力。稍。有。城。邑。餘。皆。荒。垣。敗。屋。生。理。極。蕭。索。永。樂。以。後。西。戎。奉。職。貢。不。敢。輒。相。攻。始。得。休。息。行。賈。諸。番。遂。富。饒。桑。麻。禾。黍。宛。如。中。土。人。機。巧。喜。浮。屠。法。好。歌。舞。工。紡。織。相。見。輒。跪。得。問。遣。書。戴。于。首。乃。發。之。稍。知。尊。卑。禮。節。狀。貌。亦。似。華。人。其。山。葱。嶺。爲。大。嶺。下。有。白。玉。河。綠。玉。河。黑。玉。河。產。玉。胡。錦。雙。峯。駝。諸。香。珠。珊。瑚。翡。翠。琥。珀。花。葉。布。名。馬。臘。肭。臍。金。星。石。水。銀。獅。子。阿。魏。火。州。火。州。在。嘉。峪。關。外。行。可。一。月。至。本。漢。車。師。前。後。王。地。前。王。治。交。河。城。卽。

唐交河縣。去長安八千里。後王治務塗谷。卽唐蒲類縣。去長安九千里。漢元帝時。置戊己校尉。屯田於前王庭。以其地勢高敞。名高昌壘。後魏初。有闕伯周者。自稱高昌王。唐太宗平高昌。置西州及都督府。後陷於吐蕃。其地有回鶻雜居。故又名回鶻。宋時。屢遣使貢。元號畏兀兒。隸馬哈木八國。朝號火州。其東七十里。有柳陳。西百里。有土魯番。火州城近北地卑下。山色如火。天氣多熱。城方十餘里。永樂七年。土酋遣人朝貢。十二年。吏部員外郎陳誠至其國。誠言其國風物蕭條。市里民居。僧堂過半。亦皆零落。東有荒城故址。云古高昌國治。漢西域長史戊己校尉並居焉。宣德五年。火州王哈散。土魯番萬戶賽因帖木兒。柳陳誠校者註。萬戶瓦赤刺。俱遣人貢馬及玉璞。至今入貢不絕。俗類匈奴烏孫。事天神。信佛法。貴食馬。好騎射。時節潑水爲戲。其山川。蒲類海。交河爲大。產馬。駝。鹽。白氈。布。鑛。鐵。陰牙角。阿魏。

別失八里。別失八里。在西域。永樂三年。其王沙迷查干。遣人言。哈密忠順王

安克帖木兒爲北虜鬼力赤毒死。願率兵討之。上喜。遣使賜綵幣。勅令與嗣忠順王脫脫相睦。

魯陳 魯陳一名柳城。古柳中縣。地去哈密千里。中經大川砂磧。無水草。馬牛過此輒死。大風倏起。人馬相失。道傍多骸骨。有鬼魅。行人失侶。白日迷亡。夷人謂之旱海。出川西行。至流沙河。河上有小岡。云風捲浮沙所積。道北火焰山。山色如火。城方二三里。四面多田園。流水環繞。樹林陰翳。土宜稌麥麻豆。有小蒲萄。甘甜無核。名鎖子蒲萄。氣候和煖。風俗醇朴。人二種。回回男子削髮。戴小罩刺。婦女白布裹頭。畏兀兒男子椎髻。婦人蒙阜巾。垂髻於額。大抵皆胡服。

沙鹿海牙 沙鹿海牙在撒馬兒罕東五百里。城據小岡。西北臨山河。河名水站。勢衝急。有浮梁。其地南近山。三面皆平川。人繁庶。依崖谷而居。園林廣茂。西有大沙洲。可二百餘里。無水。卽有水。人不可飲。飲牛馬亦輒死。有臭草。根株獨立。高尺許。枝葉如蓋。春生秋死。臭氣逼人。取生汁熬膏爲阿魏。亦有細草。可熬

膏。味如蜜。

賽藍。賽藍。在達失干東。西去撒馬兒罕千里。城周三里。四面平原。草木長茂。流水環繞。五穀蕃殖。秋夏閒。草生黑蜘蛛。甚小。毒甚。嚙人遍身痛。號呼聲動地。土人讓誼者。口誦呪。以薄荷枝拂中毒處。又以鮮羊肝。遍擦其體。經一晝夜。痛方息。愈後皮膚如蛻脫。牛馬被傷輒死。行人宿。必近水避之。

哈失哈力。

哈失哈力。宣德閒。遣十四人來朝貢。或曰。卽阿力馬力。

亦力把力。

亦力把力。在沙漠閒。或曰焉耆。或曰龜茲。元時名別失八里。馬哈

木封於此。洪武二十四年。國王黑的兒火者。遣人貢馬。永樂四年。王沙迷查干。遣人貢玉璞。十二年。陳吏部使其國。十六年。頭目速哥克刺滿刺來朝。言歪思。弒其從兄王納黑失只罕。自立爲王。徙其國西去。更號亦力把力。正統二年。王也先不花。遣人貢玉璞駝馬。景泰三年。遣人朝貢。天順以來。入貢不絕。其國無城郭宮室。逐水草住牧。設帳房。氈。寒暑坐臥於地。其王戴小罩刺。簪鷓翎。衣

禿袖衫。削髮貫耳。飲食肉酪。或食糶麥。爲毛布。多雪霜。平曠之地。夏秋略煖。深山大谷。六月飛雪。俗獷戾。服用污穢。上下無紀律。其山。白山葱嶺爲大。有熱海。然氣候常寒。產銅鐵鉛雌黃胡粉馬駝犛牛孔雀氍毹阿魏白氈布。

阿丹。阿丹。近古俚。瀕海。可舟行。國中富饒。有馬步勝兵七八千。鄰國畏之。永樂九年。詔中使鄭和。賜命互市。

白葛達。白葛達。海中小國。土瘠。俗尙佛教。宣德七年。國王遣和者里一思等。來朝貢。

阿哇。阿哇。永樂中。王昌吉刺。遣人來朝貢。

瑣里。瑣里。西海中小國。物產甚微。有撒哈刺諸異布。洪武五年。國王卜納的。遣撒馬牙茶嘉兒韓的亦刺丹八兒。奉金字表朝貢。圖上其土地山川。賜大統曆金幣。永樂元年。復遣人朝貢。

西洋瑣里。西洋瑣里。近瑣里。視瑣里差大。物產大類瑣里。洪武三年。使來。以

金葉表文貢方物。上喜王敬中國。涉海道甚遠。賜甚厚。永樂元年。復遣人朝貢。上曰。海外遠夷。附載番貨。勿征。二十一年。西洋十六國。遣使千二百人。貢方物。至京師。西洋瑣里貢獨豐美。

彭亨。彭亨在東南海島中。並山。山傍多平原。禽獸稀少。草樹繁茂。沃土宜穀。饒蔬果。洪武十一年。遣人奉金葉表朝貢。賜綵幣。永樂十二年。遣蘇麻固門的里來朝貢。其俗。上下親狎。無寇盜。男女椎髻。好誦佛經。煮海爲鹽。釀椰爲酒。產片腦。諸香花錫。

百花。百花在海中。依山爲國。國中有奇花嘉樹。民俗饒富。尙釋教。洪武十一年。國王刺丁刺者望沙亦。遣八智亞壇。奉金葉表朝賀。產紅猴龜筒瑋瑁孔雀。倒掛鳥胡椒。

婆羅。婆羅負山面海。人多念佛。素食。惡殺喜施。永樂四年。國王遣人勿黎哥來朝。貢眞珠瑋瑁馬瑋車渠。賜王及妃文綺。

阿魯。阿魯一名啞魯。在西南海中。土廣人稀。物產亦薄。永樂五年。國王速魯唐忽先遣滿刺哈三。附古里諸國來朝貢。令內臣至其國。賜王文綺。

小葛蘭。小葛蘭。小國也。東連大山。西南北皆海。永樂中。太監鄭和至其國。王鎖里人。遣人入貢。俗尚浮屠。重象牛。飯和酥酪。市用金銀。婚喪巾服。大類錫蘭山。自錫蘭山別那里。西北海行。六晝夜可至。

拂菻。拂菻在嘉峪關外萬餘里。洪武四年。遣其國故民捏古倫。資詔諭之。尋遣人來朝貢。其俗土屋無瓦。貴臣如王服。不尚鬪戰。鑄金銀錢。產金銀珠。西錦。千年棗。馬獨峯。駝巴攬。

古里班卒。古里班卒。在海中。永樂三年。國王遣人馬的來朝貢。其俗土瘠。穀少。登氣候不齊。夏多雨。雨即寒。俗質朴。男女被短髮。假錦纏頭。紅油布繫身。物產甚薄。

呂宋。呂宋在海中。其國甚小。顧產黃金。以故亦富厚。人頗質朴。不喜爭訟。永

樂三年。國王遣隔察老來朝貢。

合貓里。合貓里地小土瘠。國中多山。山外大海。海饒魚蟲。人亦知耕稼。永樂

三年。國王遣回回道奴馬高來朝貢。產蘇烏木胡椒。

碟里。碟里國在東南海中。大洲上。洲有諸港通海。人淳少訟。尙佛。物產甚薄。

永樂三年。國王遣使馬黑木來朝貢。

打回。打回海外小國。數爲鄰國所苦。已乃治兵器。與鄰國戰。戰勝。稍得自立。

永樂三年。遣麻勿來朝貢。

日羅夏治。日羅夏治海中。小國。無他奇產。產蘇木胡椒。人頗知種藝。無盜賊。

崇佛教。永樂三年。國王遣文那打時鎮來朝貢。

忽魯母恩。忽魯母恩在東南海中。或曰在西徼外。國小土瘠。物產薄。永樂三

年。國王遣已卽丁朝貢。

忽魯謨斯。忽魯謨斯在西南海中。東連大山。國中土厚。宜耕種。人質直。狀貌

偉碩。喜作佛事。常歌舞。惡殺。永樂三年。國王遣馬刺足來朝貢。產大馬。西洋布。獅子。駝。鷄。福祿靈羊。馬。哈獸。

甘巴里。甘巴里在南海中大島上。人多織錦。粒食。亦鮮食。永樂十二年。國王兜哇刺查遣得名公葛葛來朝貢。

麻林。麻林未詳其國所在。永樂十三年。王遣人獻麒麟。上喜。厚賜之。

古麻刺。古麻刺在東南海中。永樂時。王哇來頃本。率其臣來朝。至福州卒。賜諡康靖。勅葬閩縣。有司歲時祭。

沼納樸兒。沼納樸兒在印度之中。古所謂佛國也。永樂中。遣使詔諭。國王一不刺金玉。遣人來朝貢。

加異勒。加異勒。西戎小種。居人不及千家。貧窶乏食。常備鄰國。永樂中。王者麻里柰那。遣使別里呆不來貢方物。宣德間。遣使朝貢。

黑葛達。黑葛達。國小民貧。平川廣野。草木暢茂。禽獸鮮少。俗尙佛。畏刑。市肆

多牛羊。交易用鐵錢。宣德中。國人嘗遣使十人來朝。貢方物。

敏·眞·誠。敏·眞·誠。國亦大。多高山。水流深。縛木爲渡。日中爲市。諸賈皆集。見中國磁漆器。爭欲得之。產異香駝馬。永樂中。國王遣四十人來朝。貢。

八·答·黑·商。八·答·黑·商。永樂間。遣四十人來朝。貢方物。織皮絨。鬪香木。其國山

川明秀。人俗朴實。奉佛。有浮屠數區。壯麗如王宮。西洋西域。皆商販於此。大抵皆羽毛織文玉石香木駝羊也。布帛銀錢。皆可交易。

覽·邦。覽·邦。洪武九年。遣人來朝。貢。永樂宣德中。嘗附鄰國貢方物。其國去西域遠甚。無市買。販地多沙礫。麻麥之外。無他穀。山坡坳無峯巒。水亦淺濁。俗亦

好佛。勤賽祀。有駝馬牛羊。市亦用錢。

火·刺·札。火·刺·札。國微人弱。物產涼薄。四圍皆山。山鮮草木。水流曲折。亦無魚

蝦。城僅里許。皆土屋板屋。王居亦陋。俗尙佛重僧。喜中國磁器針線。永樂十四

年。嘗遣人朝貢。

討來思 討來思在海中。周徑不百里。城近山。山下有水。赤色。望之如火。然俗尚佛。婦人主家事。市中多駝羊馬牛。亦有布縷毛褐。交易用錢。土宜麥稌。無稻穀。宣德六年。嘗遣人朝貢。

吃力麻兒 吃力麻兒。永樂中。遣使十一人來朝。貢方物。惟獸皮鳥羽。鬪褐之類。其俗不事耕農。喜射獵。山卑水淺。西南傍海。東北林莽深密。多猛獸毒蟲。得中國雄黃麝香磁器甚喜。有達巷。無市肆。交易無期。用錢鐵。

失刺思 失刺思。永樂閒。遣人來朝貢。時遣內外官。以綺幣磁器。市馬於迤西撒馬兒罕。失刺思諸國。獻陵卽位。詔諸使至。十日內。就所在還京。無得托故稽留。宣德中。遣使八人來朝貢。

納失者罕 納失者罕。東去失刺思數日程。皆舟行海中。其國山林川澤。有林木魚蟲。城東平原。饒水草。可牧馬。馬有數種。最小者高不過三尺。俗敬事僧。僧所至。必飲食之。顧尚氣健鬪。鬪不勝者。眾共噬之。永樂中。遣使十人來朝貢。

亦思把罕。亦思把罕。於西南海中爲大國。廣袤近千里。四面皆海。西北多山。東南皆平沙。國有城堅壯。王居亦侈麗。物產豐厚。風俗質朴。尙佛。畏刑。喜施。惡奪。亦有中國人寓寄者。時時出賈撒馬兒罕。市多馬駝。少布帛。有珠珀。而無稻黍。日食惟麥糝。麥粒麤壯甘美。永樂中。遣使四十四人來朝貢。淡巴。淡巴。在西南海中。洪武十年。國王遣人來貢。賜之金幣。其國風景秀贍。土地廣衍。泉甘而水清。草木暢茂。畜產甚夥。城以石築。屋以瓦覆。王乘輿。官跨馬。頗有威儀。國人勤生種藝。織縷抱布。男女咸務常業。市有交易。野無寇盜。稱樂土矣。

甘把里。甘把里。永樂閒。遣六人來朝貢。自言其國小。介其西南海中。與諸鄰國不通交易。物產又薄。山無長林。田無宿麥。以故國用常乏。人民艱窘。然奉佛善。不求積聚。無乞丐者。

白松虎兒。白松虎兒。舊名速麻里兒。國中無大山。山卑小者亦鮮。林木無猛。

獸毒蟲之害。先時嘗有白虎。出松林中。遇獸不食。遇人不傷。旬月後。竟不見。國人稱爲神虎。父老又曰。此西方白虎降精。以是更其國爲白松虎兒。永樂中。遣使十六人來貢。

答兒密。答兒密。永樂閒。遣使十八人來朝。貢方物。賜大統曆文綺藥茶。國在海中。不百里。人不滿千家。有牆壘而無城郭。屋以板覆。田以牛耕。王居官舍。不甚差別。產馬駝羊牛毛褐布縷。交易兼用銀錢。刑專用箠朴。服屬撒馬兒罕。

阿速。阿速。在西海中。爲大國。多撒馬兒罕。天方諸國人。有城倚山面川。川南流入海。海有魚鹽之市。野有耕牧之利。敬佛畏鬼。好布施。惡爭鬪。物產饒裕。涼暄適節。人無飢寒。夜無寇盜。永樂中。遣百十二人來朝貢。

沙哈魯。沙哈魯。永樂閒。遣七十七人來朝貢。國在阿速西南海島中。人民淳直。耽鬪好佛。交易海中諸國。西域賈胡來。市海中奇物。不惜高價。亦有價廉而得奇貨去者。沙哈魯人不識也。王及酋長居城中。有瓦屋。庶人旅處城外田野。

中。村落相聚。山川環抱。畜產豐利。

西蕃。西蕃。卽土蕃。本羌屬。凡百餘種。散處河湟洮岷間。元世祖始爲郡縣。以吐蕃僧八思巴爲大寶法王帝師。領之嗣世。弟子號司空司徒國公。佩金玉印。明興。洪武六年。令諸酋舉故官授職。以攝帝師喃加巴薩卜爲熾盛佛寶國師。元國公南哥思丹亦監藏等。爲都指揮同知宣慰使元帥招討等官。自是蕃僧有封灌頂國師及贊善王。闡化王。正覺大乘法王。如來大寶法王者。俱賜印誥。令比歲或閒歲朝貢。今其地爲都指揮使司二。曰烏思藏。曰朶甘。指揮使司一。曰隴答。宣慰使司三。曰朶甘。曰董卜韓胡。曰長河西魚通寧遠。招討使司六。曰朶甘思。曰朶甘隴答。曰朶甘丹。曰朶甘滄澹。曰朶甘川。曰磨兒勘。萬戶府四。曰沙兒可。曰乃竹。曰羅思端。曰別思麻。千戶所十七。闡化。闡教。輔教三王貢。使自四川入。贊化王自陝西入。每貢百人。多不過五十人。大乘。大寶二法王。貢無。每貢僧徒十人。凡諸王嗣封。賜誥袈裟僧帽數珠鈴杵。以大慈恩寺刺麻僧二。

人充正副使。四川自黎州或天全。陝西自洮州。出境宣德元年。封大寶。大乘。闡教。闡化。贊善五王。九年。闡化王貢使亂藏等還。以賜物易茶。至臨洮。沒入茶。并畱亂藏等。聞。上命釋之。還其茶。成化五年。封闡教。輔教二王。十六年。封闡化王。皆厚賞。長河西魚通寧遠。歲一貢。貢止五六十人。多不過百人。自雅州入。正統初。來貢。賞甚厚。五年。刺麻僧貢馬。十年。番僧亦貢馬。景泰四年。入貢。賞稍減。天順元年。貢賞如故。三年。尊勝寺清修翊善大國師獲印。遣人貢舍利。成化初。番僧入貢。十二年。貢使九百人。賞少減。弘治二年。貢使千三百人。減賞。朶甘思。洪武十八年。令歲一貢。自雅州入。天順七年。宣慰使來貢。厚賞。董卜韓胡。亦一貢。如朶甘思。四川威茂松番金川雜谷達思蠻諸番僧。皆三歲一貢。貢百人。多不過百五十人。或歲一貢。貢三十人。多不過五十人。洮岷番寺。歲一貢。貢一寺四五人。番簇。二年一貢。大簇四五人。小簇一二人。至京。餘畱塞上。洪武四年。置洮州衛軍民指揮使司。永樂九年。置洮州茶馬司。火把藏思曩曰諸簇。歲納馬三

千五十匹。洪武初。置河州衛。改河州衛軍民指揮使司。七年。置河州茶馬司。必里衛。二州七站。西番二十九簇。歲納馬七千七百五匹。洪武十一年。置岷州衛軍民指揮使司。又置西寧衛。西寧茶馬司。歲納馬三千五百匹。市法。上馬茶百二十斤。中馬七十斤。下馬五十斤。五王諸僧番簇。在四川。西寧。洮岷河。出陝西。西寧在黃河北。洮岷河在黃河南。陝西諸番。畏宋將軍。四川諸番。敬信丁大夫。丁大夫。玉國初爲御史大夫。出鎮四川最久。威惠並行。夷民安輯。宋將軍晟。洪武永樂中。久鎮西陲。積功。封西寧侯。丁。宋皆充平羌將軍。成化十九年。西番滿松反。侵內地。巡撫都御史馬文升討之。斬首八十三級。正德初。北虜徙居西海。蠶食諸番。勢漸吞併。識者慮其結勾深入。如前代吐蕃吐谷渾事。當是時。虜在西海。言官言。前代有屯兵青海。以絕羌虜連和內侵者。然徵輸調發。民力大困。正德十年。調朔方勁兵逐勦。虜避走松潘。旋歸故巢。費以萬計。竟無成功。嘉靖元年。西番反。鎮守都督鄭卿討之。不能克。班師。自是歲入境。殺虜人畜。八年。洮

岷番賊。數至鞏昌。殺吏士。掠人畜。焚廬舍。隴右騷動。尙書王瓊請賊入。聽官軍襲至賊巢。勦殺番人畏之。已而兵至塞防秋套虜。番賊遂乘虛深入臨洮鞏昌。殺掠大慘。尙書李承勛言。西番土地。被西海虜酋亦卜刺侵占。日益內徙。將來番胡交通。益肆猖獗。何以善後。昔漢趙充國不戰而服羌。段熲殺羌百萬。爲費以億計。內地虛耗。是知用勇將者。雖可取快目前。任老成者。必能獲萬全之策。乞廣宣帝之明。專充國之任。制馭西番事宜。悉令瓊。從長區處。上從之。瓊曰。欲撫罕。必勦先零。遣遊擊將軍彭斌。鎮守都督劉文。統兵自固原。進至洮岷。分據要害。且撫且勦。撫定六十五簇。恃險拒戰者十六簇。斬首三百七十。西番風俗。大抵皆質直朴魯。上下一心。君臣爲友。吏治無文。音樂尙琴瑟。食酪衣氍。居毳帳。務耕牧。好很鬪。貴壯賤弱。懷恩重利。尊釋信誼。其山川。崑崙山可跋。海黃河折支。湟水爲大。產金銀銅錫。整牛名馬。天鼠皮。獨峯駝。青稞麥。螢豆。辦羊。貢物多。畫佛銅佛銅塔。舍利足力麻。鐵力麻。氍毹珊瑚犀角。左髻毛纓。明盔甲。刀劍。

遮甲麻衣馬青鹽。外史氏曰。西戎亦能爲中國患。從申侯。逼遷西周。附隗囂。族拒東漢。唐連吐番。直入長安。宋失熙河。併於西夏。爲禍不小。我以官賞貢市。羈縻之。西鄙稍寧。正德以後。邊防大弛。戎心遂啓。瓊議欲於洮岷河蘭間。繕城堡。遠斥堠。廣儲蓄。謹備海賊。勿使得連西番。卽有侵侮。發請精兵。駐臨洮鞏昌要害之地。拒之。斯良策也。

韃靼。韃靼。北胡也。卽夏獯鬻。周玁狁。秦漢匈奴。唐突厥。宋契丹。漢時。匈奴最强。匈奴弱而烏桓遂盛。漢末。鮮卑滅烏桓。鮮卑旣衰。蠕蠕强大。與魏爲敵。蠕蠕滅而突厥起。盡有西北地。唐李靖滅突厥。五代及宋。契丹爲盛。女真滅契丹。號金。侵中國。遂稱皇帝。其別小部。曰蒙古。曰太赤烏。曰塔塔兒。曰克列。各有分地。蒙古并諸部。滅女真及宋。國號元。入主中國。明興。遂元順帝。遁歸朔漠。傳子愛猷識里達臘。愛猷識里達臘死。子脫古思帖木兒。立爲可汗。我兵出塞。獲其子地保奴。脫古思帖木兒。爲也速迭兒所弑。諸大臣立坤帖木兒爲可汗。而猛哥

帖木兒爲瓦剌王。建文三年。坤帖木兒死。鬼力赤立爲可汗。阿魯帖木兒。乃兒不花。阿魯台。佐之。馬哈木者。居瓦剌。時時與阿魯台相讐殺。自順帝至鬼力赤。凡七世。其二世不可考。鬼力赤衰。諸酋立本雅失里爲可汗。殺我使臣。給事中郭驥。我遂封瓦剌馬哈木爲順寧王。太平賢義王。把禿孛羅安樂王。令伺本雅失里。我兵出塞。本雅失里敗走。阿魯台來降。封爲和寧王。而馬哈木又叛。我兵討馬哈木。敗去。阿魯台又叛。阿魯台弑本雅失里。自稱可汗。馬哈木屢敗阿魯台。而瓦剌強盛。瓦剌三王。馬哈木獨強。洪熙元年。馬哈木欲自立爲可汗。恐眾不附。仍立元孽脫脫不花爲可汗。居沙漠北。馬哈木居瓦剌。宣德九年。阿魯台死。正統元年。馬哈木之子脫懽。在沙漠西北。與其部酋朶兒只伯相讐殺。脫懽死。其子也先爲太師。驍勇。凌脫脫不花。景泰中。也先弑脫脫不花。自稱田盛大可汗。已而爲其平章哈刺逐死。天順初。孛來殺哈刺。立小王子。小王子又爲孛來癩王子所弑。孛來衰。而其大酋毛里孩。阿羅出。孛羅出。猛可少師。與孛來癩

王子讐殺而立脫思爲王。脫思者。故小王子從兄也。成化中。阿羅出結。訖加思蘭。孛羅出結。毛里孩。出入河套。訖加思蘭強。殺阿羅出。併其眾。而結滿都魯王。入河套。滿都魯稱可汗。而訖加思蘭爲太師。與毛里孩也。烈忽孛羅忽。出入塞下。訖加思蘭欲殺滿都魯。而立斡赤來爲可汗。不克。訖加思蘭爲滿都魯所殺。滿都魯衰。而把禿猛可王。太師亦思馬因。知院羅千強盛。弘治初。把禿猛可死。弟伯顏猛可立爲王。當是時。瓦剌與伯顏猛可。皆遣人入貢。而火篩數入寇。火篩者。小王子部落也。與小王子相讐殺。小王子益衰。正德中。瓦剌西徙。與土魯番相讐殺。小王子三子。長阿爾倫台吉。次阿著。滿官嗔。太師亦不刺。弒阿爾倫台吉。走河西。阿爾倫台吉二子。長卜赤。次也明。皆幼。阿著稱小王子。阿著死。眾立卜赤。稱亦克罕。卜赤死。而不及兒台吉。稱小王子。或曰。不及兒台吉。卽也明。或曰。卜赤子也。阿著二子。曰吉囊。曰俺答。亦不刺部從吉囊。火篩部從俺答。于是小王子種落又盛。嘉靖中。吉囊。俺答最強。犯我陝西河東雲中上谷。而亦不

101041785

刺及瓦刺。時時出入寧夏甘肅塞下。吉囊死。其子板不孩。與不及兒台吉。出入河套。庚戌。入古北口。犯京師。自後。秦晉燕代。漁陽遼東西。無寧歲。歲請費帑金。數百萬計。征調勞煩。而權門大吏。寵賄益章。本兵邊鎮文武大臣。多受誅殛。戰守無策。專事蒙蔽矣。其俗。無城郭宮室。徙帳房。逐水草。畜牧射獵。有徵會。刻木封箭爲信。挾其長技。上下山谷。往來聚散。忽如風雨。其喜盜好殺。輕生嗜利。篡弑蒸淫。三綱瀆亂。自古然矣。產馬橐駝野馬羴羊角端驪貂鼠青鼠土撥鼠獭沙雞酥酪。四夷。惟韃韃種最多最狡。凶悍爲中國患最甚。別爲北虜考。



國家圖書館



001685057

中華民國貳拾六年貳月再版  
中華民國貳拾貳年六月重印



(實價國幣六角)

9.2

6

籍